

MÃ'AK TE TOPA YÖG HÂM'ĀPAK MAX 'ĀKTUX

Yoām tep-tox pix, tu hām'āktux

1 ¹Nühū, yā Yeyox Kunnix yög hām'āpak max'ax, yā Topak-tok yög. ²Hömā 'ühittap 'Iyait te Topa pupi hām'āktux, hu Yeyox Kunnix yög hām'āpak max'ax 'āktux, hu nō kax'āmix tappet tu, hu:

“Topa te: 'Āte tik mōkutnāp-tup, puyīy 'üg pupi hām'āktux, puyīy 'ākeppa mōg, puyīy xa hāmmxnā'. ³Tute hām'āktux ka'ok putup hām panip xexka tu', hu hām'āktux, hu: Yümüg xuxyā nūn putup. 'Āpu yā tu hāmmxnā'. 'Āpu yā hāmmx mīy.” Kaxīy.

⁴Hāpxip 'ihā' nūn Yoām, nōm tep-tox pix. 'Ūnūn, tu nūktu' xupep hām panip xexka tu', tu tikmū'ūn putox pix, tu hām'āktux, hu:

—'Āpu yā yāyhāhup, nūy hāpkummuk mīy kux, ha 'āte 'āp-tox pix putup, puyīy Topa 'āxop yög hāpkummuk mīy'ax xaxogā', pu tu' kux. Kaxīy.

⁵Ha ta' nūn hāpxexka Yonex yög tikmū'ūn xohix xix kōmēn Yenoyanēn yög tikmū'ūn xohix, nūy Yoām yög hām'āktux 'āpax. 'Ūnūn xohix, nūktu' mōxaha', tu Yoām yög hām'āktux 'āpak, tu yāy yög hāpkummuk mīy'ax 'āktux, ha Yoām tep-tox pix kōnāg kox Yohnām kopah. ⁶Yoām te' tat topixxax, yā kāmēn xe hā' mīy, tu xokxax hāg-nāy hīy, tu kunit māhā', tu puk hep xup. ⁷Yoām te:

—Hāpxip 'ihā' nōy tek pe' nūn putup. Yā' ka'ok nō'ōm, ha tak pu'uk. 'Ūxexka xop te' yög pataxax ko'a, pu' max, pak pu'uk, hu yög pataxax ko'a, pu' kummuk. ⁸'Āte 'āp-tox pix kōnāg hā, pa tute 'āxop ha Topa Koxuk nū'kutnāp-tup, nūy 'āxop ka'ogā'. Kaxīy.

Yoām te Yeyox putox pix

⁹Ha ta' xip Yeyox kōmēn Nāyane tu' hāpxexka Ganinet kopah, tu ta' nūn, tu nūktu' xupep Yoām tu', ha Yoām te Yeyox putox pix kōnāg kox Yohnām kopah, ¹⁰tup-tox pix kux, ha kōnāg kopa' xupep Yeyox, tu' pēnāhā', ha ta pexkox xōn, ha ta' yīxohoh Topa Koxuk, yā kuxxuxtut putuk. 'Ūnūn, tu nūktu Yeyox yīmū' xupep. ¹¹Ha ta pexkox kopa Topa te:

—Xōnnē!, 'āte mō'āyāy xe'ēgnāg. Xatek kuxa hittupmāhā'. Kaxīy.

Hãmgâyãgnãg te Yeyox xapit

¹²Hãpxip 'ihã Topa Koxuk te Yeyox mōkutnãhã hãm panip xexka tu',
¹³ha ta' mōg, tu' xip, ha Hãmgâyãgnãg te Yeyox xapit, puyiy hãpkummuk
mũn mĩy, pa' mĩy 'ohnãg, ha ta' pip xokxop gãy, pa pexkox yōg nũ'pok
xop te Yeyox pẽnã max. Yã' xip Yeyox 'ãmnĩy xohix te' 40 hã.

Yeyox te hãpxopmã kōnãmãhã hãpxexka Ganinet tu'

¹⁴Hãpxip ha ta xonat te Yoãm mũg, tu kanet ka'ok kopa' xix, 'ihã putpu'
nũn Yeyox, tu nũktu' xupep hãpxexka Ganinet tu', tu Topa yōg hãm'ãpak
max'ax 'ãktux, ¹⁵tu:

—Hõnhã Topa te yãy yōg tikmũ'ũn xat putup, ha' yĩpkox pip putup. 'Ãpu yã
yãyhãhup, nũy hãpkummuk mĩy kux. 'Ãpu yã 'ãkuxa mãm Topa yōg hãm'ãktux
kopah, puyiy Topa 'ãkuxa kummuk xit, nũy kuxa max mō'tat, 'ũyãnãn tu'. Kaxiy.

¹⁶Ta' mōg Yeyox kōnãg xexka Ganinet kux tu', pa' pip tik tix, yã
Ximãm Pet xix taknõy 'ũxuxet'ax 'Ãnene', ha kōnãg xexka tu mō tutpanip
yõn. Yã mãpxexex putuk, hu mãm xukpax. ¹⁷Ha Yeyox te:

—Mã, nũy 'ũg pe mōg. 'Ãxop te mãm xuk, pa 'ãte xa hãmyũmmũgãp-
tup, xayiy 'ũg ha tikmũ'ũn nũnnã'. Kaxiy.

¹⁸Ha tik te tutpanip nĩm, tu ta' mōg Yeyox peheh,

¹⁹tu' mōg, pa' pip tik tix nõy, yã Tiak xi' taknõy Yoãm, yã Yemeneo kutok,
tu mĩpkox kopa' mãm, tu tutpanip mãynãg mĩy, ²⁰ha Yeyox te tik xãnãhã',
ha' tak nĩm xix kãmãnat xop nĩm mĩpkox kopah, tu Yeyox pe' mōg.

Tik kopa' xip yãmĩy kummuk

²¹Tu' mōg Yeyox xix yōg tihik, tu mōktu' mōxaha kōmẽn Kapãnãm
tu', tu' nox pip. Nit xap ha ta' mōg Yeyox, tu Yoneo xop yōg Topa pet hã
mō'nãhã', tu tikmũ'ũn pu hãmyũmmũgãhã', ²²ha tikmũ'ũn te' xupak,
tu hãmyũmmũg'ax putuppax. Yã Yeyox 'ũka'ok, tu hãmyũmmũg, tu
hãmyũmmũgã max, 'ap tik te hãmyũmmũg xop putuk'ah.

²³Ha ta' nũn tihik, ha' kopa' xip yãmĩy kummuk, ha tik te hãm'ãktux
ka'ok, hu:

²⁴—Kōmẽn Nãyane yōg Yeyox, putep mũn mĩy putup? 'Ok 'ãnũn, nũy
'ũkputex? 'Ãte 'ãyũmmũg. Topa te 'ãyãyikutnãhã'! Kaxiy.

²⁵Pa Yexox te yãmĩy kummuk xat, hu:

—Hãm'ãktux hok, nũy ta 'ãpep! Kaxiy.

²⁶Yãmĩy kummuk te tik yãy nuhugãhã', tu hãm'ãktux ka'ok, tu ta
hãptopa' xupep, ²⁷ha tikmũ'ũn kuxa te' yëy, tu' yĩkopit, hu:

—Pute 'ũm? 'Ok tute hãpxop tup yũmmũgãhã'? Tute yãmĩy kummuk
xat, ha' yĩpkox pip, nũy xupep. Kaxiy.

²⁸Hãpxip kutõgnãg 'ihã tikmũ'ũn xohix te' yũmmũg hãpxexka Ganinet
xexka tu', Yeyox te hãpxopmã max xe'ëgnãg.

Yeyox te Xīmām Pet xetut mūktut hittupmāhā'

²⁹Tu ta' mōg Jesus xix Tiak xix Yoām, tu mōktu' mōxaha Xīmām Pet pet hā, yā 'Ānene pet kamah. ³⁰'Ūxip Xīmām Pet xetut mūktut, tu' pip, tu' xax pukpex, ha tikmū'ūn te nōm 'āktux mō'ka'ok, ³¹ha ta' mōg Yeyox 'ūn yīkāgnāg, tu' nōy yīm mūg, tu' yīm xīnnāhā', ha' yūm, tu' xuxi', tu' nōy pu' hām mīptut kopah.

Yeyox te tikmū'ūn pakut xohix hittupmāhā'

³²'Āmāxāgnāg, ha ta tikmū'ūn te' nūnnāhā tikmū'ūn pakut xohix xix yāmīy kummuk te tikmū'ūn kopa' pip xop nūnnāhā Yeyox tu' ³³ha ta' nūn kōmēn yōg tikmū'ūn xohix xexka', tu nūktu mīptut yīkāgnāg tu' pip, nūy pēnā', ³⁴ha Yeyox te tikmū'ūn pakut xohix hittupmāhā', tu hāmpakut xohix mōy, tu yāmīy kummuk xohix mōy, ha yāmīy kummuk xohix te Yeyox yūmmūg, yīy Yeyoy te nōm xat, pu hām'āktux hok.

Yeyox xip hāpxexka Ganinet tu'

³⁵Hāptup nūn, ha ta Yeyox yāy koxak, tu ta' mōg, tu mōktu hām panip xexka tu' xupep, tu Topa pu hām'āktux, ³⁶pa Xīmām Pet te Yeyox xak xi' xape xop te' xak punethok, ³⁷tu' nūn, tu nūktu' xipihī', tu:

—Tikmū'ūn xohix te 'āxak. Kaxīy.

³⁸Ha Yeyox te:

—'Āpu yūmū mōg xiptuxexka xohix mōyāykoxip, tu' tikmū'ūn nōy hah, nūy Topa yōg hām'āpak max'ax 'āktux hato'a kamah. Yā 'ūgnūn hām xexka tu', nūy tikmū'ūn xohix pu Topa yōg hām'āpak max'ax 'āktux. Kaxīy.

³⁹Tu ta' mōg, tu hāpkumep punethok hāpxexka Ganinet xexka tu', tu Topa yōg hām'āpak max'ax 'āktux punethok Yoneo xop yōg Topa pet xohix kopah, tu yāmīy kummuk mōy.

Yeyox te tik xax kunutnām tapmāhā'

⁴⁰Ha ta' nūn tihik, tu' xax kunutnām, 'ūnūn, tu nūktu Yeyox yīkāgnāg 'ūkopaxux hā' xip, tu ta tu' xak, hu:

—'Āte' yūmmūg. Xatep-tup, nūy ta 'ūkxax tapmā yūmmūg. Kaxīy.

⁴¹Ha' kuxa ka' punethok, tu' nōy yīmū yāy yīm xix, hu:

—Hamūn, 'ātep-tup. 'Āxax tap. Kaxīy.

⁴²Hāpxip 'ohnāg 'īhā' xax kunutnām tap. Yā' hittup.

^{43,44}Ha Yeyox te' xat ka'ok, hu:

—'Ūxupax. Tikmū'ūn pu nū hāpxopmā'ax 'āktux hok. Mōg 'āmānex hah, puyīy 'āxax pēnā'. 'Āpu 'āmānex pu hāpxop hōm, puyīy Topa pu nōm hōm, xayīy Mōyyex yōg xat'ax mīy. Hā kaxīy tikmū'ūn te' yūmmūg, 'āxax tap. Kaxīy.

Tu tik xat, pu mōg. ⁴⁵Ha ta' mōg tihik, tu' xohix pu hām'āktux kōnāmāhā', hu:

—Pēnā', Yeyox tek xax tapmāhā'. Kaxīy.

Hã kaxiy Yeyox te kômên xohix hã' mō'nã xaptop 'ohnãg. Yã tikmũ'ũn te Yeyox yũmmũg, yiy ta' nox xip hãm panip xexka tu', ha ta' nũn tikmũ'ũn xohix, nũy Yeyox xax.

Yeyox te tik hãpkumep hok hittupmãhã'

2 ¹ 'Ãmnĩy xohix nōg, 'ihã putpu' mōg Yeyox kômên Kapãnãm tu', tu nũktu mĩptut hã mō'nãhã'. Pa hãpxip 'ihã tikmũ'ũn te hãm'ãktux, ha tikmũ'ũn xohix te' yũmmũg, 'ũxip Yeyox, ² tu ta' nũn tikmũ'ũn, yã yãytunũ'nãhã 'ũxohix, ha mōktu mĩptut hã nũ'xĩmnãg xix hãmyĩkox yĩka nũ'xip kama hãptopah, ha Yeyox te tikmũ'ũn pu Topa yōg hãm'ãktux'ax 'ãktux, ³ ha ta' nũn tik te' ⁴, tu tik hãpkumep hok nũnnãhã', yã tutpe hã mō'tat. ⁴ 'Ũnũn pa' pip tikmũ'ũn xohix, yiy ta Yeyox ha' mōg 'ohnãg mĩptut kopah, hu ta pepi' mōg, tu mōktu mĩptut yĩmũ' mãm, tu hãpxax mōy Yeyox xuka', tu ta hãm tu tutpe hã tik pakut xix Yeyox keppa', ⁵ ha Yeyox te' yũmmũg tik kuxa mãm ka'ok. Yeyox te tik hãpkumep hok pu hãm'ãktux, hu:

—'Ũgnix, Topa te 'ōg hãpkummuk mĩy'ax xaxogãhã', ha' kux. Kaxiy.

⁶ Ha ta' pip tik te hãmyũmmũg xop, tu' kuxa kopa' yĩkopit, hu: ⁷ "Texiy hãm'ãktux? Tute Topa 'ãktux kummuk! Tep te hãpkummuk mĩy'ax xaxogã yũmmũg? Yã Topap-xehnãg te!" Kaxiy.

⁸ Pa Yeyox te tik yōg hãpe'paxex'ax yũmmũg, tu:

—Texiy 'ãkuxa kopa 'ãyĩkopit? ⁹ Hãm'ãktux 'ũm yãyxat 'ohnãg? 'Ok pe tik hãpkumep hok pu hãm'ãktux, hu: "Ãte 'ōg hãpkummuk mĩy'ax xaxogãhã', ha' kux," kaxiy, 'ok pe hãm'ãktux, hu: "Ãpu 'ãyĩpxit, nũy pepix xhip, nũy 'ōg tutpe pepix xup, nũy ta mōg"? Kaxiy. ¹⁰ 'Ãte hãpxopmã putup, ha 'ãxop te' pãnãp-tup, hu' yũmmũg, 'ũgmũn yã Tikmũ'ũn Kutok te tikmũ'ũn yōg hãpkummuk mĩy'ax xaxogã'ax nũnte hãm xexka tu'. Kaxiy.

Tu tik hãpkumep hok pu hãm'ãktux, hu:

¹¹—'Ãpu 'ãyĩpxit, nũy pepi xhip, nũy 'ōg tutpe pepi' xup, nũy ta mōg yãy pet hah. Kaxiy.

¹² Hãpxip 'ohnãg 'ihã tik te hãpkumep hok yĩpxit, nũy pepi' xip, nũy yãy yōg tutpe pepi' xup, tu ta' mōg, ha tikmũ'ũn xohix te' pãnãhã', tu' kuxa te' yëy, tu Topa 'ãktux max, hu:

—Tikmũ'ũn te hãpxopmã'ax nōy hã kaxiy pãnã 'ohnãg! Kaxiy.

Yeyox xix Nemi'

¹³ Ta xe' mōg Yeyox, tu mōktu' xupep kōnãg xexka Ganinet tu', ha ta' nũn tikmũ'ũn xohix Yeyox hah, ha' xohix pu hãmyũmmũgãhã'.

¹⁴ Tu ta' mōg, pa' xip Nemi', yã 'Ãppeo kutok, tu' yũm gohet pupi tayũmak pop'ax pet kopah, ha Yeyox te Nemi pu hãm'ãktux, hu:

—Mã, nũy 'ũkpe mōg. Kaxiy.

Nemi pepi' xip, tu ta pe' mōg, tu mōktu Nemi pet hã' mōxaha', ¹⁵ ha hãpxip 'ihã' xit Yeyox xix yãy yōg tik xop xix gohet pupi tayũmak pop'ax

xop xix hãpkummuk mĩy'ax xop nõy, ¹⁶ha ta' nũn tik te hãmyũmmũg xop xix Paniye xop nũn, tu nũku' pẽnãhã', Yeyox xit tik mũtik xix gohet pupi tayũmak pop'ax xop mũtik, tu Yeyox yõg tik xop pu' yĩkopit, hu:

—Teptu Yeyox xit 'ũkummuk xop mũtik? Kaxĩy.

¹⁷Ha Yeyox te' xupak, tu tik te hãmyũmmũg xop pu hãm'ãktux, hu:

—Nonot xop te' hittup xop hã te 'ohnãg, pa pakut xop hã tehet. Hã kãxĩy 'ũgnũn, nũy hãpkũmmuk mĩy'ax xop xãnã', pa' max xop xãnã 'ohnãg. Kaxĩy.

Yeyox te' xit hok 'ãktux

¹⁸Ha ta' pip Yoãm mũtik mõg xop xix Paniye xop, tu' xit hok, nũy Topa pu hãm'ãktux.

Ha ta' xip Yeyox, ha ta' nũn tikmũ'ũn, tu nũktu' yĩkopit, hu:

—Yoãm mũtik mõg xop xit hok, nũy Topa pu hãm'ãktux xix Paniye xop te' kamah. Texĩy 'õg tik te' 12 xop xit hok 'ohnãg, nũy Topa pu hãm'ãktux? Kaxĩy.

¹⁹Ha Yeyox te:

—Tikmũ'ũn te yãyta pẽnãhã', ha' xip tik te yãytap-tup. 'Ok tikmũ'ũn xit hok nõmhã'? 'Ãmhok, yã' xit. ²⁰Nãy, pu tik te yãyta mõg, ha tikmũ'ũn xit hok nõmhã'. Hã kaxĩy 'ũkxip, 'ĩhã yãy yõg tik te' 12 xit hok 'ohnãg. Nãy, 'ũgmõg putup, 'ĩhã' xit hok putup. Kaxĩy.

²¹Tu Yeyox te xe:

—Tikmũ'ũn te' xap 'ohnãg topixxax yãg tup, yã' pix 'ohnãg, xix topixxax kunox. Ka' xap, ha' pix, puxix yãg yãy nũ'nã', ha topixxax yãy pot. ²²Ha ta' pux 'ohnãg tikmũ'ũn te xupyãg tup xokxax kox kutut kopah. Ka' pux, puxix xupyãg xokxax kox koxyoõ, ha' xaxok xupyãg, ha' kummuk xokxax kox. Pa' pux xupyãg tup xokxax kox tup kopah, pu' max. Hã kaxĩy tikmũ'ũn te mõnãyxop yõg hãpxopmã'ax tat, xix kama yõgnũ hãpxopmã'ax tat, pu' kummuk. Kaxĩy.

Yeyox te 'ãmnĩy hãm hok 'ãktux

²³Nit xap, yã 'ãmnĩy hãm hok, ha ta' mõg Yeyox xix yãy yõg tik te 12 xop, tu mõktu xuxnãg ta xe tox yõg hãm mep, tu xuxnãg ta xe tox mep, nũy mã', ²⁴ha ta' nũn Paniye xop tu' yĩkopit, hu:

—Teptu 'õg tik xop te' mep 'ãmnĩy hãm hok 'ĩhã'? Yã' kummuk. Yũmũ yõg xat'ax kax'ãmi tappet tu', tu' xat, pu hãm hok 'ãmnĩy hãm hok 'ĩhã'. Kaxĩy.

²⁵Ha Yeyox te:

—'Ok 'ãxop te' mõkupix tappet tu'? Putep mũn mĩy Namix? Yã putup tep-tex Namix xix yãy yõg tihik. ²⁶Namix mõg, tu mõktu Topa pet hã mõ'nãhã', pa' mãm pãm, yã Topa keppa' mãm, ha Namix te' pãm pop tu' mãhã', tu yãy yõg tik xop pu' popmãhã', puyĩy mã', 'ĩhã 'ãmãnex yã 'Amit, tu 'ãmãnex xop xohix xat 'ũkax'ãmi yũmũ yõg xat'ax yõg tappet tu'. 'Ûxat, pu 'ãmãnex te nõm pãm mã', pa' nõy mã hok, pa Namix te' mãhã'. Kaxĩy.

²⁷Ha Yeyox te xe:

—Topa te tikmũ'ün pu 'ãmnĩy hãm hok mĩy, pa 'ap 'ãmnĩy hãm hok pu tikmũ'ün mĩy'ah. Yã 'ãmnĩy hãm hok te tikmũ'ün yõg kãmãnat putuk, pa tikmũ'ün te 'ãmnĩy hãm hok yõg kãmãnat putuk 'ohnãg, ²⁸ha tak mũn Tikmũ'ün Kutok te' xat 'ãmnĩy hãm hok yõg hãpxopmã'ax. Kaxĩy.

Yeyox xix tik yĩm te nũ' yã yã nũnnãhã'

3 ¹Tu ta' mõg Yeyox, tu mõktu Yoneo xop yõg Topa pet hã xe mõ'nãhã', pa' xip tihik, tu' yĩm te nũ' yã yã nũnnãhã', ²ha ta' pip tikmũ'ün, tup-tup, nũy Yeyox hãpkummuk mĩy pãnã' nit xap 'ihã', nũy hãm'ãktux, hu:

—Yeyox te' xat'ax mĩy 'ohnãg. Kaxĩy.

³Ha Yeyox te tik pu hãm'ãktux, hu:

—Mã'. Kaxĩy.

⁴Tu ta tikmũ'ün pu hãm'ãktux hu:

—Putep xat Topa yõg xat'ax yõg tappet? Putep xat, puyĩy tikmũ'ün hãpxopmã nit xap 'ihã', yã 'ãmnĩy hãm hok 'ihã': 'ok pe hãpxopmã max, 'ok pe hãpxopmã kummuk? 'Ok pe tikmũ'ün hinnãhã, 'ok pe tikmũ'ün nĩm, puyiy xakix? Kaxĩy.

Pa tikmũ'ün te hãmaãktux 'ohnãg. ⁵Ha' gãy Yeyox, tu' kuxa hittup 'ohnãg, tikmũ'ün te hãmyümmũg putup 'ohnãg hah.

Ta Yeyox te tik pu:

—'Äpu yã 'üyoa 'ãyĩm. Kaxĩy.

Ha' yoa', ha' yĩm hittup.

⁶Hãpxip ha ta' mõg Paniye xop, tu mõktu xat'ax xexka 'Enot yõg xop mütik hãm'ãktux, tu hãm'ãktux texiy Yeyox putex putup.

Yeyox te pakut xop nõy hittupmãhã'

⁷Ha ta' mõg Yeyox xix yã yõg tik te 12 xop, tu mõktu' mõxaha kõnãg xexka Ganinet kux tu'. Ha ta' nũn tikmũ'ün xohix, yã hãpxexka Ganinet yõg xop, xix hãpxexka Yonex yõg, ⁸xix kõmẽn Yenoyanẽn yõg, xix hãpxexka 'Inumẽn yõg, xix kõnãg kox Yohnãm kũnãpa yõg xop, xix kõmẽn Tinok yõg, xix Tinok yĩmap pip xop, xix kõmẽn Xinõm yõg, xix Xinõm yĩmap pip xop. Yã' xohix te Yeyox yõg hãpxopmã'ax 'ãpak, hu' nũn, nũy Yeyox pãnã', ⁹ha ta yã yõg tik xop mõ'pok Yeyox te, puyiy mĩpkox nũnnã', puyiy tikmũ'ün xohix Yeyox mõ'yõn hok. ¹⁰Yã tikmũ'ün xohix hittupmãhã Yeyox te', yiy ta tikmũ'ün pakut xohix nũn, nũy yã mõ'yõn, nũy Yeyox 'ãpit, puyiy hittupmã'. ¹¹Ha ta' pip tikmũ'ün, tu' kopa' pip yãmĩy kummuk, tu' nũn, tu nũktu kup tomãhã Yeyox keppah, tu hãm'ãktux ka'ok, hu:

—'Ämũn yã Topak-tok! Kaxĩy.

¹²Pa Yeyox te yãmĩy kummuk xat ka'ok, hu:

—Hãm'ãktux hok, yãg-mũn yã Topak-tok 'ãktux hok. Kaxĩy.

Yeyox te yã yõg tik te 12 yĩmõgãtux

¹³Tu ta' mõg Yeyox, tu mõktu yĩktix tu' pũnãmep, tu' nõy xãnãhã', ha ta' nũn, ¹⁴ha Yeyox te tik te 12 yĩmõgãtux, puyiy Yeyox mütik mõg, puyiy Yeyox tik

mõ'pok, puyiy tik Topa yög hã'm'ãpak max'ax 'ãktux, yã' xuxet'ax Yeyox yög mõ'pok xop. ¹⁵Yeyox te nõm ka'ogãhã, pu yãmïy kummuk mõy. ¹⁶Tik te 12 xop kopa' pip yã Ximãm, kama' xuxet'ax Pet, ¹⁷xix Tiak xi' taknõy Yoãm, yã Yemeneo kutok, yã Tiak xix Yoãm 'ãxet'ax nõy Motnëy, yã tikmũ'ün yiy'ax kopa yã' yãy no'ok kutok, ¹⁸xix 'Ãnene', xix Pinip, xix Matõmëo, xix Mãteo, xix Tõmë', xix 'Appeo kutok Tiak, xix Tanep, xix Ximãm, yã tutep-tup, puyiy 'Iyaet xop yãyhã xexkah, ¹⁹xix Yot 'Ixkanot, yã tute' gãy xop mógãhã Yeyox hah, puyiy xüygã'.

Yeyox xix Hãmgãyãgnãg

²⁰Ha ta' nũn Yeyox, tu nõktu mĩptut hã mõ'nãhã', ha tikmũ'ün xohix nũn, ha Yeyox xit putup, pa yã' xit 'ohnãg, yã tikmũ'ün xohix pip. ²¹Ha ta' nũn Yeyox xape xop, nũy Yeyox mógã', yã' xupak tikmũ'ün te' xuktux Yeyox putox kummuk, ²²ha kãmën Yenoyanën yög tik te hãm yũmmũg xop te:

—Yeyox kopa' xip Meyemo', yã yãmïy kummuk xop yög xat'ax, ha Meyemo te Yeyox ka'ogãhã', puyiy yãmïy kummuk mõy. Kaxiy.

²³Ha Yeyox te tikmũ'ün xohix xãnãhã', nũy hãm yũmmũgã', tu hãm'ãktux'ax hã hãm yũmmũgãhã'. Tute:

—Texiy Hãmgãyãgnãg te tikmũ'ün kopa yãy xut? ²⁴Hãpxexka yög tikmũ'ün te yãy pot, nũy yãy kix, tu hãpxip 'ihã' xakix 'ũxohix. ²⁵'Uxape xop te yãy pot, nũy yãy kix, tu hãpxip 'ihã' nõg 'ũxape xop. ²⁶Hã kaxiy Hãmgãyãgnãg xop te yãy pot, nũy yãy kix, puxix xakix 'ũxohix.

²⁷—'Uxupxet te hãpxop hã' xupxet putup mĩptut kopah, pa' xip tik ka'ok mĩptut kopah. Texiy hãpxop xupxet putup? Yã tik ka'ok poxıt hã' hiy hãmãxap, tu nõmhã' xupxet. Hã kaxiy 'ãte Hãmgãyãgnãg hiy, nũy tikmũ'ün kopa yãmïy kummuk mõy.

²⁸—'ãpu 'ũxaxogã hok. Topa te tikmũ'ün yög hãpkummuk mĩy'ax xohix xaxogã yũmmũg, pu tu' kux. Tikmũ'ün te Topa 'ãktux kummuk, ha Topa te' xaxogã yũmmũg, pu tu' kux. ²⁹Pa tikmũ'ün te Topa Koxuk 'ãktux kummuk, ha Topa te' xaxogã yũmmũg 'ohnãg. Yã' xip 'üyög hãpkummuk mĩy'ax mõkuma' móg, tu' kux 'ohnãg. Kaxiy.

³⁰Hã kaxiy hãm'ãktux Yeyox. Hamũn, tikmũ'ün te hãm'ãktux, 'ũxip yãmïy kummuk Yeyox kopah. Pa 'ãmhok, yã Topa Koxuk te' kopa' xip.

Yeyox mũktut xi' taknõy xop

³¹Ha ta' nũn Yeyox mũktut xi' taknõy xop, tu nõktu hãptopa' pip, tu' nõy mõ'kutnãhã', puyiy Yeyox xãnã'. ³²Ha ta kopa' mãm tikmũ'ün Yeyox mũtik, tu hãm'ãktux, hu:

—Hãptopa' pip 'ãtut xix 'ãtaknõy xop, tu 'ãxãnãhã'. Kaxiy.

³³Ha:

—Tep-te 'ũktut putuk xik taknõy xop putuk? Kaxiy.

³⁴Tu' yãy yĩmap xop pãnãhã', tu:

—Pãnã nũhũ', yãg tut xik taknõy xop.

³⁵Nôm te' mĩy Topa te nôm putup, yãg taknõy xop xik hex xik tut yãg xape xop. Kãxĩy.

Hãpxopxap

4 ¹Ta xe tikmũ'ün pu hãmyümmügãhã Yeyox te kõnãg xexka Ganinet kux tu', ha ta' pip tikmũ'ün xohix, yĩy ta' mõ'nãhã mĩpkox hã, tu' yüm, ha' pip tikmũ'ün hãmhümnãg hãm kux tu', ²ha Yeyox te hãm'ãktux'ax hã hãpxop xohix yümmügãhã', nüy Topa yõg hãpxopmã'ax yümmügãhã', tu:

³—'Ûgxupex, 'ümõg tihik, nüy hãpxopxap mõ'pok, ⁴tu hãpxopxap mõ'pok, ha yãg te nü'nãhã putat kopah, ha ta' nün putuxnãg, tu' xohix mãhã', ⁵ha ta' yãg nõy te nü'nãhã hãm kutõgnãg kopa mĩkaxxap yĩmũ' yüm, tu hãpxip kutõgnãg 'ihã' xokax hãm tünẽmnãg tu', ⁶pa mãyõn xip, ha mõ'hap, tu' nak, yã' yĩpxatit kutõgnãg, hu' nak, ⁷ha ta' yãg nõy te nü'nãhã mĩmyãm kup kakak, tu' xokax, tu' tuk, ha mĩmyãm kup tuk, tu' nõy mõ'nĩy, ha' ta 'ohnãg, ⁸ha ta' yãg nõy te nü'nãhã hãm max kopah, tu' xokax, tu' tuk, tu mõktu kup puxet te mĩnta te' ³⁰popmãhã', ha ta kup nõy ta' tu ⁶⁰, ha ta kup nõy ta tu ¹⁰⁰. Kãxĩy.

⁹Tu xe:

—'Ãyĩpkox pip, nüy ta 'ãpu yã xupax. Kãxĩy.

Yeyox te hãpxopxap 'ãktux

¹⁰Ha ta' mõg tikmũ'ün punethok, ha ta' yãg xip Yeyox mütik xix Yeyox yõg tik te ¹²xop mütik, tu yãy tu nü'nãhã', nüy Yeyox mütik hãm'ãktux, tu: —Hãmyümmüg'ax 'üm yümmügãhã xate? Kãxĩy.

¹¹Ha:

—Texĩy Topa te yãy yõg tikmũ'ün xat, ha' yĩpkox pip? Topa te xa' müg. Pa Topa te 'ãxop künãpa pip xop pu hãmyümmügãhã hãm'ãktux'ax hã, ¹²puyĩy hãmpẽnã', pa hãmyümmüg 'ohnãg, puyĩy hãm'ãpak, pa hãmyümmüg 'ohnãg, puyĩy yãy yõg hãpkummuk mĩy'ax nĩm hok, puyĩy Topap-tuppax hok, puyĩy Topa tikmũ'ün yõg hãpkummuk mĩy'ax xaxogã hok, pu tu' kux 'ohnãg. Kãxĩy.

¹³Tu xe:

—'Ãxop te hãm'ãktux'ax yümmüg 'ohnãg. Texĩy 'ãxop künãpa pip xop te nôm yümmüg? Kãxĩy.

¹⁴Tu xe:

—Tik te hãpxopxap mõ'pok. Hã kãxĩy tikmũ'ün te Topa yõg hãm'ãktux'ax 'ãktux, ha hãpxopxap te Topa yõg hãm'ãktux putuk, ¹⁵ha ta hãpxopxap yãg te nü'nãhã putat kopah, ha ta' nün putuxnãg, tu' mãhã'. Hã kãxĩy tikmũ'ün te Topa yõg hãm'ãktux'ax 'ãpak, pa Hãmgãyãgnãg nün, tu Topa yõg hãm'ãktux'ax xut. ¹⁶Ha ta hãpxopxap yãg te nü'nãhã hãm kutõgnãg kopa mĩkaxxap yĩmũ' yüm, tu' xokax, tu' nak mõ'ka'ok 'üyĩpxatit kutõgnãg hah. Hã kãxĩy tikmũ'ün te Topa yõg hãm'ãktux 'ãpak, tu' kuxa hittup, ¹⁷pa hãpxip 'ihã tikmũ'ün te' kuxa mãm xop kute'ex kummuk, ha' kuxa mãm kux. ¹⁸Ha ta hãpxopxap yãg te nü'nãhã mĩmyãm kup kakak, tu' xokax, ha mĩmyãm te' nõy mõ'nĩy, ha' ta 'ohnãg. Hã kãxĩy tikmũ'ün te

Topa yôg hãm'ãktux 'ãpak, ¹⁹pa hãm xexka yôg hãpxopmã'ax pe'paxex punethok, tu 'ûp-texop xexkap-tup, tu hãpxop xohix putup, hu Topa yôg hãm'ãktux xaxok, tu hãpxopmã max mÿ'y'ah. ²⁰Ha ta hãpxopxap yãg te nũ'nãhã hãm max kopah, tu' xokax, tu' tuk, tu mõktu kup puxet te mĩnta te' 30 popmãhã', ha ta kup nõy ta' tu 60, ha ta kup nõy ta' tu 100. Hã kaxiy tikmũ'ûn te Topa yôg hãm'ãktux'ax 'ãpak, tu' kuxa mãm nõm kopah, tu hãpxopmã max punethok. Kaxiy.

Kuyãnãm

²¹Tu Yeyox te xe:

—'Ok tikmũ'ûn te kuyãnãm tat'ax xex manax kopah? 'Ãmhok. 'Ok tikmũ'ûn te kuyãnãm tat'ax xex mĩmpe mõ'yõn'ax kakak? 'Ãmhok. Pa tikmũ'ûn te kuyãnãm tat'ax yôg yũm'ax yĩmũ' xex, ha nõmhã kuyãnãm max, ha tikmũ'ûn te hãpxop pãnãhã'. ²²Hã kaxiy tikmũ'ûn te hãpxopmã xaptop hõnhã', ha tikmũ'ûn te' pãnã 'ohnãg, pa hãpxip 'ihã tikmũ'ûn xohix te' pãnãp-tup. ²³'Ãyĩpkox pip, nũy ta 'ãpu yã xupax. Kaxiy.

²⁴Ta Yeyox te xe:

—'ãpu 'ãkuxa hã' xupax. Xate 'ãnõy yôg hãpxopmã'ax kopit, puxix Topa te 'õg hãpxopmã'ax kopit, yã' yãy putuk, yã Topa te 'õg hãpxopmã'ax kopit xe'ëgnãg putup. ²⁵Tikmũ'ûn yôg hãpxop pip, puxix hãpxop nõy pop putup. Tikmũ'ûn yôg hãpxop kutõgnãg pip, puxix nõm xaxok putup.

Hãpxopxap

²⁶Tu Yeyox te xe:

—Texiy Topa te yãy yôg tikmũ'ûn xat, ha' yĩpkox pip? Yã' putuk, tik te hãpxopxap mõ'pok, ha' xokax, tu' tuk. ²⁷Texiy 'ûxokax? Texiy 'ûtuk? Tik te' yũmmũg 'ohnãg. 'Ãmnỹ hã mõ'yõn, tu hãptup hã hãpkumep, 'ihã' tuk. ²⁸Hãpxopxap te hãm hã' mõxaha', tu' xokax, tu' tuk, ha' tut pip, ha' xap ta punethok. ²⁹Yã' ta, ha tik te' mep kupukhe hã, tu' nũnnãhã'. Hã kaxiy Topa yôg tikmũ'ûn xohix nõy nã' mõg, Topa te nõm xat. Kaxiy.

Mõytat xap

³⁰Tu Yeyox te xe:

—Texiy Topa te yãy yôg tikmũ'ûn xat, ha' yĩpkox pip? Texiy 'ãte xa hãmyũmmũgãp-tup? ³¹Yã hãpxopxap putuk, yã mõytat xap putuk. Yã' kutõgnãg mõytat xap, pa hãpxopxap nõy xohix 'ûxexkah. ³²Tikmũ'ûn te mõytat xap xok, tu' xokax, tu' tuk, tu mõktu kup tox, ha ta' kup nõy kutõgnãg, ha mõytat kup mãg xexkah, ha ta' nũn putuxnãg, tu yãy pet mÿy mĩm mãg tu'. Hã kaxiy Topa yôg tikmũ'ûn xop kutõgnãg hãmãxap, pa' xohix nõy nã'mõg tu mõktu' xohix. Kaxiy.

³³Hã kaxiy Yeyox te tikmũ'ûn pu hãmyũmmũgã punethok hãm'ãktux'ax hã, yĩy tikmũ'ûn te hãmyũmmũg. ³⁴Yã tikmũ'ûn pu hãmyũmmũgãhã hãm'ãktux'ax hã, pa yãy yôg tik te 12 xop mütik hãm'ãktux nõy, nũy hãmyũmmũgã'.

Yeyox te 'āmuuh xat xix kōnāg tot

35 'Āmnīy ha ta yāy yōg tik xop pu Yeyox te:

—'Āpu yūmū kōnāg xexka xak, nūy kūnāpa mōg. Kaxīy.

36 Ha Yeyox yōg tik xop te tikmū'ūn mō'pok hato'ah, ha' mōg, ha ta' mōg tihik Yeyox hah, tu yōg mīpkox hā' mōxaha', tu ta' mōg Yeyox mūtik, ha ta mīpkox xape mōg kama nūmūtik, 37 pa hāpxip 'ihā 'āmuuh xexka nūn, ha ta' nūn kōnāg tot xexka', tu nūktu mīpkox hā' mōxaha', ha mīpkox te kōnāg hā nū'xip, 38 ha Yeyox mō'yōn mīpkox xahixpa tu', tup-tox tep-tox yūm'ax yīmū' yūm, ha Yeyox yōg tik xop te' nuhuk, ha' koxak, ha hām'āktux, hu:

—Yāyā, yūmūg xakix putup. 'Ok 'ūgmūg kuxa ka'? Kaxīy.

39 Ha Yeyox yok, tu 'āmuuh xat xix kōnāg tot, puyiy tu xuxix, ha' xuxix, tu nū'yēy. 40 Ha Yeyox te yāy yōg tik xop pu yīkopit, hu:

—Texiy 'ākuxa nōg? 'Ok 'ākuxa mām 'ohnāg? Kaxīy.

41 Ha tik kuxanōg, tu:

—'Ū'ūm tihik? Yā tute 'āmuuh xat xix kōnāg tot, ha' xuxix, tu nū'yēy! Kaxīy.

Tik kopa' pip yāmīy kummuk

5 1 Tu ta' mōg Yeyox xix yāy yōg tik xop mīpkox hā, tu mōktu' mōxaha kōnāg xexka Ganinet kux tu' hāpxexka Yenax tu', 2 tu mīpkox nīm, tu ta' mōg, pa' xip tihik, ha tik kopa' pip yāmīy kummuk. 3 Yā tik pet yūm xukpot tu', ha' nūn. Yā' gāy, ha tikmū'ūn te' hīy yūmmūg 'ohnāg māxap hā. 4 Yā tikmū'ūn te' mūg punethok, nūy māxap hā' hīy 'ūyīm xi' pata', pa tik te' koxyōy 'ūxohix, tu' mōg. Yā tikmū'ūn te' hīy yūmmūg 'ohnāg. 5 Hāptup 'ihā' xip tihik yīktix tu' xix xukpot tu' xix 'āmnīy 'ihā kamah, tu' xahok ka'ok, tu yāy po'oxnām mīkaxxap hā. 6 Ta Yeyox pēnāhā hāptox tu, tu ta' nōy ha' nūn mō'ka'ok, nūktu Yeyox pu nū'xup, 7 tu hām'āktux ka'ok, hu:

—Yeyox, yā Topa xexka xe'ēgnāg kutok, 'āte xa tatu' xak: 'Āpu yā 'ūgkummugā hok! Kaxīy.

8 Yā hamūn, Yeyox te: “Yāmīy kummuk, tik kopa 'āpep!” Kaxīy.

9 Tu Yeyox te:

—'Āxuxet'ax texiy? Kaxīy.

Ha:

—'Ūkxuxet'ax 'Ūxohix Xop, yā 'ūgmūgmūn punethok. Kaxīy.

10 Tu xe:

—'Āpu 'ūgmūg mō'pok hato'a hāptox tu'. Kaxīy.

11 Ha ta' pip xapup xohix, tu' xit yīktix tu' hāmhūmnāg.

12 Ha yāmīy kummuk te Yeyox pu hām'āktux, hu:

—'Āpu 'ūgmūg xat, 'ūyīy xapup hā mōxān' Kaxīy.

13 Ha Yeyox te' xat, ha tik nīm, tu ta' mōg, tu mōktu xapup hā' mōxaha'. Yā' xohix xapup, yā' xohix te' 2000 kōmnāg, tu ta' mōg mō'ka'ok, tu mō'yīyxoho', tu mōktu kōnāg xexka hā' mōxaha', tu' xakix xit hā.

¹⁴Ha ta' nū'paha xapup pēnā'ax xop, tu nōm 'āktux kōmēn yōg tikmū'ūn pu xix hām panip yōg tikmū'ūn pu', ¹⁵ha ta' nūn tikmū'ūn xohix, nūy hām pēnā', tu' nūn, tu nūktu Yeyox yīka' pip, tu tik pēnāhā', pa' pip'ah yāmīy kummuk tik kopah, ha tikmū'ūn kuxa te' yēy. Yā tik yūm, tu' xax taha', tup-tox max. ¹⁶Ha ta tikmū'ūn pu hāpxopmā'ax xohix 'āktux nōm te tik pēnāhā xix xapup, ¹⁷tu Yeyox pu tatu' xak, puyīy mōg hato'ah, ¹⁸ha ta' mōg Yeyox, tu mīpkox hā mō'nāp-tup, ha tik nūn, tu: —'Ūgmōg putup 'āmūtik. 'Ok max? Kaxīy.

¹⁹Pa Yeyox te:

—'Āmhok. 'Āpu mōg yāy pet hah, nūy 'āxape xop pu' xuktux yūmūg xuxyā Topa te xa' mīy. Kaxīy.

²⁰Ha ta' mōg tihik, tu mōktu hām'āktux Kōmēn te' 10 tu', xix kōmēn yīkak, yā' xuktux Yeyox te' mīy, ha tikmū'ūn xohix tep-tup pax.

Yax te Yeyox xānāhā'

²¹Ha ta' mōg Yeyox mīpkox hā, tu kōnāg xexka xak putpu', tu mōktu' xupep, ha ta' nūn tikmū'ūn xohix, nūy Yeyox pēnā', ²²ha ta' nūn tihik 'ūxuxet'ax Yax, yā Yoneo xop yōg Topa pet yōg tik xat'ax, 'ūnūn, tu nūktu Yeyox pata yīka' mōhāmnīy, ²³tu:

—'Ūk-tok hex xok putūmnāg. 'Āpu mōg, nūy 'ūyīmū 'āyīm nōm, puyīy xuxix, puyīy hi! Kaxīy.

²⁴Ha ta' mōg Yeyox tik mūtik xix tikmū'ūn xohix mūtik. Yā tikmū'ūn xohīynāg, hu yāy mō'yōn.

Yeyox te 'ūn pakut hittupmāhā'

²⁵Ha ta' nūn 'ūhūn, yā' pakut, yā 'ūn hep kux 'ohnāg hām yāxatamuk xohix te' 12 hā. ²⁶Yā nonot punethok te tu' popmāhā hehmēn, yīy tayūmak noa! 'Yā' hittup 'ohnāg, pa' pakut xexka nōy nā' mōg. ²⁷Tikmū'ūn te Yeyox 'āktux, ha 'ūn te' xupak, tu ta' mōg, tu tikmū'ūn xohix kopa' mōg, tu Yeyox pe' mōg, tu' topixxax 'āpit. ²⁸Yā 'ūn te hāmpē'paxex, hu: “'Āte 'ūyōg topixxax 'āpit, kopxix hittup.” Kaxīy. ²⁹Hāpxip kutōgnāg 'īhā' hep kux, ha 'ūn te' yūmmūg 'ūhittup xe'e!, ³⁰ha Yeyox te' yūmmūg yāy kopa' xupep hāpka'ok. Yeyox yōkānām, tu tikmū'ūn pu' yīkopit, hu: —'Ū'ūm te yōg topixxax 'āpit? Kaxīy.

³¹Ha Yeyox yōg tik te 12 xop te:

—Tikmū'ūn xohix te yāy mō'yōn 'āyīmap. Texīy xate' yīkopit? Kaxīy.

³²Pa Yeyox yōkānām, nūy pēnā nōm te' xupit,

³³ha 'ūn te' yūmmūg, hu' nūn, tu nūktu Yeyox pata yīka mōhāmnīy, tu' yīpkutuk, hu yāy puxu'ux, tu hāpxopmā xohix 'āktux. ³⁴Ha Yeyox te:

—Tukūm, 'ākuxa yūm ka'ok 'ūgkopah, hu 'āhittup. 'Āpu 'ākuxa nōg hok. Mōg! 'Āhittup! Kaxīy.

Yeyox xix Yax kutok

³⁵Yeyox te 'ün mütik hãm'aktux, ha ta' nün Yax yög kãmānat, yā Yax pet tu' nün, nūktu:

—Yax, 'āk-tok hex xok. 'Āpu notot Yeyox xānā hok. Kaxīy.

³⁶Pa Yeyox te nūmütik hãm'aktux 'ohnāg, pa Yax pu hãm'aktux, hu:

—'Āpu 'ākuxa nōg hok. 'Āpu 'ākuxa yūm ka'ok! Kaxīy.

³⁷Yeyox te tikmū'ün xohix xat, pu mōg hok yāy mütik, pa' xat, pu mōg Pet xix Tiak xix Yoām, ³⁸tu ta' mōg, tu mōktu Yax pet hā' mōxaha', pa' pip tikmū'ün, tu' potaha', tu' xaho ka'ok, ³⁹ha Yeyox te:

—Texīy 'āxop potaha', nūy xaho ka'ok? 'Ūk-tok hex xok tāmānāg 'ohnāg. Yā mō'yōn. Kaxīy.

⁴⁰Ha tikmū'ün yīxix, pa Yeyox te xohix xat, pu hāptopa mōg. Yā' mōg 'ūxohix. Ha ta' mōxaha Yeyox xix yāy yög tik te' 3 xik-tok hex mūktak xi' tut 'ūk-tok hex yög mīptut kox hā, ⁴¹ha Yeyox tek-tok yīm mūg, tu:

—“Tanita kōmīy!” Kaxīy. Yā tikmū'ün yīy'ax hā: “Nixix, 'āpu 'āk-nīhāxip!” Kaxīy.

⁴²Yā hāpxip 'ohnāg 'īhāk-tok hex yīpxit, nūy pepi' xip, nūy hāpkumep, ha tikmū'ün te' yēy. Yāk-tok hex yög hāmyāxatamuk xohix te 12, ⁴³ha Yeyox te tikmū'ün xat, puyīy tikmū'ün pu nōm 'aktux hok, tu' xat, puk-tok hex pu xit'ax hōm.

Yeyox xip Nāyane tu'

6 ¹Tu ta' nün putpuk Yeyox xix yāy yög tik xop kōmēn Nāyane tu', tu nūktu kōmēn hā' mōxaha'. ²Nit xap 'ihā' mōg, tu mōktu Yoneo xop yög Topa pet hā mō'nāhā', tu tikmū'ün pu hāmyūmmūgāhā', ha tikmū'ün te' xupak, tu hãm'aktux'ax putup nōg, tu:

—Texīy tik te hāpxop xohix yūmmūg? Tep te tik pu hāmyūmmūgāhā'? Texīy tik te hāpxopmā ka'ok xe'ēgnāg? ³Yūmū'āte tik yūmmūg. Yā mīmpe mīy, yā Mānix kutok, yā taknōy 'ūxuxet'ax Tiak, xix Yoye', xix Yot, xix Xīmām. Yā' hex tihī nūnteh kamah. Kaxīy.

Yā tikmū'ün te' yūmmūg putup'ah, Yeyox yā Topak-tok. ⁴Pa Yeyox te:

—Tikmū'ün te yāy xape 'āpak 'ohnāg nōm te Topa pupi hãm'aktux. Kaxīy.

⁵Yeyox te hāpxopmā ka'ok xe'ēgnāg, pa' mīy kutōgnāg. Yā' pakut xop yīmū' yīm xex, nūy hittupmā' yā 'a' xohix'ah hittupmāhā' kōmēn Nāyane tu'. ⁶Yā tikmū'ün kuxa mām 'ohnāg, ha Yeyox kuxa hittup 'ohnāg.

Yeyox yög tik te 12 xop mōg

Tu ta' mōg Yeyox, tu mōktu xiptuxexka xohix yög tikmū'ün pu hāmyūmmūgāhā kōmēn Nāyane yīkak. ⁷Tu ta' xānāhā yāy yög tik te 12 xop, ha' nün, ha Yeyox te nōm ka'ogāhā', puyīy yāmīy kummuk mōy. Tute tik mō'pok, pu mōg 'ūtix tu pe' tix hā kaxīy, puyīy yāmīy kummuk mōy. ⁸Yeyox te:

—Hāpxop tat hok, yā xit'ax tat hok, xix tayūmak tat hok, pa mīm hām tonnognā 'āmōg. ⁹Āpu pataxax tat. 'Āpu kāmīn puxehnāg mō'tat. Kaxīy. ¹⁰Tu xe:

—'Āxop mōg putup, tu kōmēn hā 'āmōxap-tup, tu mīptut hā' 'āmōxap-tup. 'Āpu nox pi' mīptut puxet kopah, tu mōktu 'āmōg, tu kōmēn nīm.

¹¹Pa kōmēn yōg tikmū'ūn te 'āp-tup nōg, tu hām'āktux'ax putup nōg, nūy ta mōg. 'Āpu nox pi' hok. 'Āxop te yāy pataxax tu hāpxut nuhuk putup, xayīy hām'āktux 'ūkummuk tikmū'ūn. Kaxīy.

¹²Ha ta' mōg Yeyox yōg tik xop, tu tikmū'ūn pu hām'āktux, hu:

—'Āpu 'āyāyhāhup, nūy hāpkummuk mīy kux. Kaxīy.

¹³Tik te yāmīy kummuk mōy, tu tikmū'ūn punethok pakut putox pix heptox hā, tu nōm hittupmāhā'.

Yoām xok

¹⁴Ha ta' xip 'Enot, yā tikmū'ūn yōg xat'ax xexkah, tu nōm hāpxopmā'ax 'āpak, yā tikmū'ūn xohix te Yeyox yūmmūg, tu hām'āktux punethok. Tikmū'ūn yāg te:

—Yā' putpu' hi Yoām nōm tep-tox pix, tu hāpxopmā ka'ok xe'ēgnāg. Kaxīy.

¹⁵Ha ta yāg te:

—Yā 'Enit. Kaxīy.

Ha ta yāg nōy te:

—Yā tute Topa pupi hām'āktux, yā Topa pupi hām'āktux xop hittap putuk. Kaxīy.

¹⁶Ha 'Enot te' xupak, tu:

—Yā Yoām nōm tep-tox pix. Hōmā 'āte' xat, pup-tox xax, ha' kuyut, pa hōnhā putpu' hi'! Kaxīy.

¹⁷Hamūn, hōmā 'Enot te' xat, puyīy xonat Yoām mūy, puyīy 'ūyīm hīy, puyīy kanet ka'ok kopa' xix. Texīy? Yā hōmā 'Enot xix 'Enonit te yāy taha', pa 'Enonit yā 'Enot taknōy Pinip xetut, ¹⁸yīy ta Yoām te 'Enot pu hām'āktux, hu: “Yā' max'ah. Topa yōg xat'ax kax'āmīx tappet tu, tu' xat, xayīy yāyta hok 'ātaknōy xetut mūtīk!” Kaxīy.

¹⁹Yīy ta' gāy 'Enonit, tu Yoām putup nōg, hup-tup, puyīy Yoām putex. Pa 'āmīhok, ²⁰yā 'Enot te Yoām yīpkutuk, yā tute' yūmmūg yā' max xe'ēgnāg Yoām, ha Yoām putex putup'ah. Yoām te 'Enot pu hām'āktux punethok, ha 'Enot kuxa hittup 'ohnāg, pa 'Enot te 'nōy yōg hām'āktux'ax putuppax.

²¹Pa hāpxip 'īhā 'Enot te yāy yōg hāmyāxatamuk yōg 'āmīk xexka mīy, ha ta' nūn gohet yōg xexka xop, yā' xat'ax xexka xop, xix xonat yōg xat'ax xop, xix hāpxexka Ganinet yōg xat'ax xop. ²²Ha ta' nūn 'Enonit kutok hex, nūktu' hāmyā max, ha 'Enot tep-tuppax xexka', yā hāmyā max. 'Enot tek-tok hex pu hām'āktux, hu:

—Xate putep-tup? 'Āte xa' hōm putup. Kaxīy.

²³Tu xe hām'āktux xex, hu:

—Xate putep-tup? Yā 'āte xa popmāp-tup hāpxop xohix, tu mōktu yōg hāpxop xahix, yā' xahix yōgnū hāhām, xi' xahix yōgnū tikmū'ūn! Kaxīy.

²⁴Ha ta' mōg 'ūk-tok hex, nūy tut mūtīk hām'āktux, nūy yīkopit, ha' tut te:

—'Ãpu tatu' xax Yoãm putox nõm tep-tox pix. Kaxĩy.

²⁵Ha putpu' nũn 'ũxat'ax tu', tu:

—'Ã' hõm mõ'ka'ok Yoãm putox kãnẽypetxax yĩmũ' yũm! Kaxĩy.

²⁶Ha ta' kuxa hittup 'ohnãg 'Enot, pa yã hãm'ãktux xex tu Topa 'ãxet'ax 'ãktux ha tikmũ'ũn xohix te' xupak, yĩy ta' hõm putup, ²⁷hu hãpxip 'ohnãg 'ĩhã xonat mõ'kutnãhã', puyĩy Yoãm putox nũnnã', ha ta' mõg xonat kanet ka'ok tu', tu Yoãm putox xak, ²⁸tu kãnẽypetxax yĩmũ' nũnnãhã', tuk-tok hex pu' hõm, ha ta' mõg, tu' tut pu' hõm. ²⁹Ha ta' yũmmũg Yoãm mũtik mõg xop, tu ta' nũn, tu nũktu Yoãm xokxax paha', tu ta' mõg, tu mõktu mĩkaxxap kox kopa' xix xukpot tu'.

Yeyox te tikmũ'ũn xohix pu' xit'ax popmãhã'

³⁰Ha ta' nũn Yeyox yõg tik te 12 xop Yeyox hah, tu nũktu yã yõg hãpxopmã'ax xohix 'ãktux xix yõg hãmyũmmũg'ax xohix, ³¹pa' pip tikmũ'ũn xohix, tu xohix te hãpkumep, yĩy ta' xit 'ohnãg Yeyox yõg tik xop, yã tikmũ'ũn xohix pip. Ha Yeyox te yã yõg tik xop pu hãm'ãktux, hu:

—'Ãpu yũmũ mõg hãm panip xexka tu', nũy hãm hok. Kaxĩy.

³²Tu ta' mõg, tu mĩpkox hã' mõxaha', tu ta' mõg, tu kõnãg xak. ³³Pa tikmũ'ũn punethok te mõg'ax pãnãhã', yã' Yeyox pãnãhã xix tik xop. Ha ta' nũn xiptuxexka xohix yõg tikmũ'ũn, tu pata hã' nũpaha hãm kux tu', tu nũktu' mõxaha', tu' nõy hip. ³⁴Ha ta' xupep mĩpkox kõnãg xexka kux tu', ha Yeyox te' pãnãhã tikmũ'ũn xohix, tu' kuxa ka'. Kahnẽn yõg pãnã'ax xip'ah. Hã kaxĩy tikmũ'ũn putuk. Yã' hittup 'ohnãg, yĩy' kuxa ka', tu tikmũ'ũn pu hãmyũmmũgãhã kõnãmãhã hãpxop punethok.

³⁵Mãyõn mõ'nãp-tup 'ĩhã' nũn Yeyox yõg tik xop, tu nũktu Yeyox pu hãm'ãktux, hu:

—Mãyõn mõ'nãp-tup, yã hãm panip xexka nũnteh, yã xit'ax pip 'ohnãg. ³⁶'Ãpu yã tikmũ'ũn xat, pu mõg hãpxa'ax tu' xix xiptuxexka tu', puyĩy xit'ax pop. Kaxĩy.

³⁷Pa Yeyox te:

—'Ãpu tikmũ'ũn pu xit'ax popmã'. Kaxĩy.

Ha tik xop te:

—Texĩy pãm popmã tikmũ'ũn xohix pu'. 'Ûyõg tayũmak xohix, yã tayũmak 'ãnuk xohix te' 200, yã tayumak yãnãm ponnok. Kaxĩy.

³⁸Ha:

—Pãm xohix texĩy pip 'õhnũ'? Mõy pãnã' Kaxĩy.

Tik mõg, tu putpu' nũn, tu:

—Yã pãm te' 5 xix mãm tix. Kaxĩy.

³⁹Ha Yeyox te tikmũ'ũn xat, puyĩy xux yĩmũ' mãm, puyĩy yãnõm xohix hã' mãm, ⁴⁰ha' yãnõm hã' mãm, yã' yãnõm kopa' mãm xohix te' 100 xi' nõy kopa' mãm xohix te' 50 hã kaxĩy. ⁴¹Ha Yeyox te' pãm te' 5 pop xix mãm tix, tu pexkox pãnãhã', tu:

—Topa, xate nũ' popmãhã'. Yã 'ãmax. Kaxĩy.

Tu pãm koxip, tu yãy yõg tik xop pu' popmãhã', puyĩy tikmũ'ũn pu popmã'. Tik te' popmãhã'. Ha ta mãm tix koxip, tu' popmãhã kamah, ⁴²ha tikmũ'ũn xohix te' mãhã', tu mõktu xe xit putup'ah. Puxix. ⁴³Ha ta' mõg Yeyox yõg tik xop, tu pãm yãg pop xix mãm yãg. Yã pãm yãg hã nũ'xip manax xohix te' 12 xix mãm hã, ha' nũnnãhã'. ⁴⁴Hamũn, yã' xohix te pãm mãhã', yã' tik xohix te' 5000.

Yeyox te kõnãg yĩmũ' mõg pata hã

⁴⁵Hãpxip 'ihã Yeyox te yãy yõg tik xop pu hãm'ãktux hu: —'Ãpu mĩpkox hã mõxakux, nũy mõg kũnãpa hãpkux nõy tu' xiptuxexka Metxax tu', ha 'ãte tikmũ'ũn mõ'pok putup. Kaxĩy.

⁴⁶Ha ta' mõg Yeyox yõg tik xop, ha ta' mõg Yeyox, tu yĩktix yokoma', nũy Topa pu hãm'ãktux. ⁴⁷'Amniy 'ihã' pip Yeyox yõg tik xop mĩpkox kopa kõnãg xexka kote', ha ta yãp-xehnãg xip Yeyox hãpkux tu', ⁴⁸tu yãy yõg tik xop pãnãhã'. Tik te mĩpkox hã mõgãhã', pa yã mõg putux, yã 'ãmuuh te ha' nũn. Hãmyãykuhmõy ha ta' mõg Yeyox, tu kõnãg xexka yĩmũ' mõg pata hã, tu nõã' yãn putup.

⁴⁹Ha tik te' pãnãhã yã Yeyox te kõnãg yĩmũ' mõg pata hã, ha hãmp'e'paxex yã yãmiy putuk, tu' xahok. ⁵⁰Yã' xohix te' pãnãhã', tu' yĩpkutuk. Pa hãpxip 'ihã Yeyox te:

—'Ãkuxa nõg hok! Yãg mũn. 'Ûgyĩpkutuk hok! Kaxĩy.

⁵¹Tu ta mĩpkox hã mõ'nãhã Yeyox, tu' xip yãy yõg tik xop mütik, 'ihã' kux 'ãmuuh. Ha tik xop kuxa te' yëy, ⁵²yã tik te' yũmmũg 'ohnãg texiy Yeyox te tikmũ'ũn te' 5000 xitnãhã', yã tik putox ka'ok.

Yeyox te tikmũ'ũn hittupmãhã Yẽnẽyane tu'

⁵³Tu ta' mõg Yeyox xix yãy yõg tik xop, tu mõktu kõnãg kox kux tu' mõxaha' hãpxexka Yẽnẽyane tu', tu mĩpkox tutxit hã hiy kõnãg kux tu', ⁵⁴tu ta' mõg, pa tikmũ'ũn pip, tu Yeyox pãnãhã', ⁵⁵tu ta' mõg, tu' pet xohix ha' xupaha', tu tikmũ'ũn pakut tutpe hã' put nũn, tu nũktu Yeyox ha' nũnnãhã', ha Yeyox te nõm hittupmãhã'. ⁵⁶Tu ta' mõg Yeyox, tu hãpkumep xiptuxexka xohix tu' xix kãmãn xohix tu' xix yãnõm xohix tu', pa' pip tikmũ'ũn xohix, tu' nũnnãhã tikmũ'ũn pakut, tu nũktu nãpet hãm tu' xex, tu Yeyox tu' xak, pu tux, puyĩy pakut xop Yeyox yõg topixxax kuyãg 'ãpit, ha pakut xohix te' xupit, tu' hittup.

Yoneo xop te mõnãyxop yõg hãpxopmã'ax tat

7 ¹Ha ta' nũn Paniye xop xix tik te hãmyũmmũg xop, yã kãmãn Yenoyanãn tu' nũn, tu nũktu Yeyox ha yãy tu nũ'nãhã'. ²Yã hõmã nõm te' pãnãhã Yeyox yõg tik xop xit 'ũyĩm xut putũynãg hã, yã 'ap yĩm pix'ah. Yã Paniye xop te tikmũ'ũn xat, pu yãy yĩm pix. ³Yã Yoneo xop te mõnãyxop yõg hãpxopmã'ax tat, ha Paniye xop te Yoneo xop kopa' xip, tu mõnãyxop yõg hãpxopmã'ax tat punethok, tu yãy yĩm pix max, tu nõmhã' xit, ⁴tu nãpet tu' nũnnãhã hãpxop, tu nõm pix 'ũxohix, tu mõnãyxop yõg hãpxopmã'ax nõy tat. Yã kõnãg xo'op'ax pix xix nax xix kanenãm.

⁵Tu ta' yĩkopit Paniye xop te xix tik te hãmyũmmũg xop te', hu:

—Texiy 'õg tik xop te mõnãyxop yõg hãpxopmã'ax tat 'ohnãg, hu yã yĩm xut putũynãg hã' xit? Kaxiy.

⁶Ha Yeyox te:

—Ãpa max, pa yã 'ãkuxa kummuk. Hõmã 'Iyait te 'ãxop 'ãktux! Tute kax'ãmi, hu: “Topa te: ‘Tikmũ'ũn tek mũn 'ãktux max, pa yã' kuxa tek mũn xak 'ohnãg. ⁷Tikmũ'ũn tek mũn pu nũktettex, pa yã' kummuk. Yã tikmũ'ũn te yã yõg hãm'ãktux'ax 'ãktux, tu: Yã Topa yõg xat'ax nũhũ!’ ” Kaxiy.

⁸Tu Yeyox te xe:

—Ãxop te Topa yõg xat'ax mĩy 'ohnãg, nũy mõnãyxop yõg hãpxopmã'ax tat. Kaxiy.

⁹Tu Yeyox te xe:

—Ãxop te Topa yõg xat'ax nĩm pax, nũy yã yõg xat'ax mĩy. ¹⁰Yã hõmã Mõyyex te' xat, hu: “Ãpu 'atak mõ'yã yẽ'ẽgnãg, nũy nõm pu hãpxopmã max. 'Ãpu 'ãtut mõ'yã yẽ'ẽgnãg, nũy nõm pu hãpxopmã max.” Kaxiy. ¹¹Pa 'ãxop te tikmũ'ũn pu hãmyũmmũgãhã', hu: “'Ûxip tikmũ'ũn yõg hãpxop, tu Topa pu' hõm, tu yã 'atak pu' hõm 'ohnãg xi' tut pu' hõm 'ohnãg. Nõmhã' max. ¹²Nõmhã' hõm hok.” Kaxiy. ¹³Pa 'ãmhok, hãm'ãktux kummuk. Hã kaxiy 'ãxop te Topa yõg hãm'ãktux 'apak 'ohnãg, pa yã yõg ham'ãktux 'apak, tu 'ãk-tok pu nõm yũmmũgãhã', tu 'ãxop te hãpxopmã kummuk nõy punethok hã kaxiy. Kaxiy.

Tep te hãmkummugãhã'?

¹⁴Yeyox te xe tikmũ'ũn xãnãhã', ha' nũn, ha hãm'ãktux, hu:

—Ãpu yõg hãm'ãktux'ax 'apax max, nũy hãmyũmmũg: ¹⁵⁻¹⁶Tikmũ'ũn hãptopa' pip hãpxop, tu tikmũ'ũn hã' mõxaha', tu' kopa' pip nõmhã. Yã hãpxop te kaxiy te tikmũ'ũn kummugã 'ohnãg. Pa hãpxop pip tikmũ'ũn kopah tu' mõxaha', tu mõktu hãptopa' pip. Yã hãpxop te kaxiy te tikmũ'ũn kummugãhã'. Kaxiy.

¹⁷Tu ta' mõg Yeyox, tu mõktu mĩptut hã mõ'nãhã', ha ta' nũn Yeyox yõg tik xop, nũy Yeyox yõg hãm'ãktux'ax yĩkopit, ¹⁸ha Yeyox te:

—Ãxop te tikmũ'ũn xohix putuk, yã hãmyũmmũg 'ohnãg. Hãpxop te hãptopa' pip, tu tikmũ'ũn yĩkox hã' mõxaha', tu kopa' pip. Yã hãpxop te kaxiy te tikmũ'ũn kummugã 'ohnãg. ¹⁹Yã' kuxa hã' mõxa 'ohnãg, pa yã' tex hã' mõxaha', tu hãpxip 'ihã' mõg hãptopah. Kaxiy. Yã Yeyox te' xuktux, yã' max xit'ax xohix.

²⁰Yeyox te xe:

—Hãpxop 'ũm te tikmũ'ũn kummugãhã'? Hãpxop 'ũm te tikmũ'ũn kopa' pip, tu' mõxaha', tu' mõg hãptopah? ²¹Yã' pip hãpxop kummuk tikmũ'ũn kuxa kopah, yã tikmũ'ũn te hãmp'e'paxex kummuk, nũy hãpxop kummuk mĩy, yã' xupxet, tu tikmũ'ũn putex, ²²tu' nõy hã' xupxet, tu' xupkũmĩy, tu hãpkummugã pax, yã' koit, tu hãmkute'ex pax, tu' yĩpkumĩy, tu' mãnõg kummuk, tu yã yexka pe'paxex, tup-tox kummuk. ²³Yã nõm xohix hãpxop kummuk te tikmũ'ũn kopa' pip, tu' mõxaha', tu mõktu hãptopa' pip. Yã hãpxop te kaxiy te tikmũ'ũn kummugãhã'. Kaxiy.

'Ūn puknōg

²⁴Tu ta' mōg Yeyox, tu mōktu hāpxexka tu' mō'nāhā kōmēn Tinok yīkak, tu mīptut hā mō'nāhā, tu yāy xaptop putup, pa' āmhok, yā tikmū'ūn xohix te' yūmmūg. ²⁵Ha ta' nūn 'ūhūn, hak-tok hex kopa' xip yāmīy kummuk. Yā tikmū'ūn te Yeyox 'āktux, ha 'ūn te' xupak, hu' nūn, tu nūktu' kopaxux hā' xip Yeyox yīkak. ²⁶Yā 'ūn puknōg, yā hāpxexka Xitpenīy yōg, tu Yeyox tu' xak, puyīy yāmīy kummuk xut 'ūk-tok hex kopah. ²⁷Ha Yeyox te:

—Tikmū'ūn tek-tok pu xit'ax hōm hāmāxap. 'Āp max'ah kakxop yōg xit'ax paha', tu kokex pu' hōm. Hā kaxīy Yoneo yōg hāpxop hōm hok puknōg xop pu'. Kaxīy.

²⁸Pa 'ūn te:

—Yāyā, hamūn, pa kokex kutok te mīmpe xit'ax kaka' pip, ha kakxop yōg pām yāgnāg xaha', ha' māhā'. Kaxīy.

²⁹Ha Yeyox te:

—Xate hām'āktux max. 'Āpu mōg yāy pet hah. Xip'ah yāmīy kummuk 'āk-tok kopah. Yā' mōg. Kaxīy.

³⁰Tu ta' mōg 'ūhūn yāy pet hah, tu nūktu' xupep, pa' xip 'ūk-tok hex, tu mīmpe mō'yōn'ax yīmū' pip, ha yāmīy kummuk xip'ah 'ūkopah.

Tik yīpkox hok, tu hām'āktux yūmmūg 'ohnāg

³¹Ha ta' xip Yeyox kōmēn Tinok yīkak, tu ta' mōg, tu kōmēn Xinōm hā' tep, tu Kōmēn te' 10 yōg hāpxexka tep, tu mōktu kōnāg xexka Ganinet tu' xupep.

³²Ha ta' nūn tikmū'ūn, tu' nūnnāhā tihik, yā' yīpkox hok, tu hām'āktux yūmmūg 'ohnāg. Tikmū'ūn te Yeyox pu' xak, puyīy tik yīmū' yīm xex, puyīy hittupmā'. ³³Ha ta' mōg Yeyox xix tihik tikmū'ūn xohix kūnāpah. Yeyox te yāy yīpkutok hā' nōy yīpkox 'āpit, tu' yīynīn, tu' yīkox hep hā' nōy yōyxōg 'āpit yāy yīpkutok yā, ³⁴tu pexkox pēnāhā pepix, tu xit xut xexkah, tu:

—“Epatah!” Kaxīy. Yā tikmū'ūn yīy'ax hā: “Pu yā 'āyīpkox xōn, nūy hām'āpax!” Kaxīy. ³⁵Ha' yīpkox max, tu hām'āpak, ha' yōyxōg max, tu hām'āktux max.

³⁶Ha Yeyox te tikmū'ūn xat puyīy nōm 'āktux hok. Yeyox te' xat punethok hā kaxīy, pa tikmū'ūn te nōm 'āktux punethok, ³⁷ha tikmū'ūn te' xupak, tu' kuxa te' yēy, tu:

—Tik te hāpxopmā max xe'ēgnāg' Tute tik yīpkox hok xupakgāhā, tu tik te hām'āktux yūmmūg 'ohnāg xat, puyīy hām'āktux! Kaxīy.

Yeyox te tikmū'ūn te' 4,000 pu xit'ax popmāhā'

8 ¹Hāpxip ha ta' yāy tu nū'nāhā tikmū'ūn xohix, tu yōg xit'ax pip'ah. Ha' xip Yeyox, tu yāy yōg tik te 12 xop xānāhā, tu:

²—'Āte tikmū'ūn kuxa ka', yā 'āmnīy tikoyuk hā' pip tikmū'ūn 'ūgmūtik, ta hōnhā 'ūyōg xit'ax 'ūm pip'ah. ³'Ūmā hok, ha 'āte tikmū'ūn mō'pok 'ūpet hah, puxix xakux putat kopah, 'ūpu'uk tu'. Yā hāptox tu' nūn tikmū'ūn. Kaxīy.

4 Ha Yeyox yōg tik xop te:

—Tep-te tikmũ'ũn pu xit'ax hāmenex nũnte hām panip xexka tu'? Yā' pip'ah xit'ax. Yā tikmũ'ũn xohix. Kaxĩy.

5 Ha Yeyox te:

—Pām xohix texĩy 'ōgnũ? Kaxĩy.

Ha:

—'Ūxohix te' 7. Kaxĩy.

6 Ha tikmũ'ũn xat, pu hām tu' mām, tu pām te' 7 pop, tu Topa pu hām'aktux, hu:

—Xate 'ūgmũ'ã pām popmāhã. 'Āmax. Kaxĩy.

Yeyox te pām koxip, tu yāy yōg tik xop pu' popmāhã', puyĩy tikmũ'ũn pu popmã'. 7 Ha ta' pip māhām kamah, yā' xohix'ah, ha Yeyox te Topa pu mām 'aktux, tu yāy yōg tik xop pu' popmāhã', puyĩy tikmũ'ũn pu' popmã', 8 ha tikmũ'ũn te' māhã', tu mōktu xe xit putup'ah, yā puxix, ha Yeyox yōg tik xop te' xit'ax yāgnāg yāy tu nũ'xok manax te' 7 hã nũ'xip. 9 Yā tikmũ'ũn xohix te' 4.000 te' māhã pām xix māhām.

Ha ta tikmũ'ũn mō'pok hato'a Yeyox te', 10 tu ta' mōg yāy yōg tik xop mūtik, tu mĩpkox hã' mōxaha', tu ta' mōg tu mōktu' mōxaha hāpxexka Namānot tu'.

Peniye xop te Yeyox tu' xak, puyĩy hāpxopmã ka'ok xe'ēgnāg

11 Ha ta' nũn Paniye xop, tu Yeyox mūtik hām'aktux, tup-tup, puyĩy Yeyox hām'aktux kummuk, hu ta tu' xak, puyĩy hāpxopmã ka'ok xe'ēgnāg, pu tikmũ'ũn pēnã', puyĩy tikmũ'ũn yūmmūg Topa te Yeyox ka'ogāhã', 12 ha Yeyox te xit xut xexka, tu:

—Teptu tikmũ'ũn te hāpxopmã'ax ka'ok xe'ēgnāg xak, puyĩy tikmũ'ũn pēnã'. 'Āte xa hām'aktux, 'āte xa hāpxopmã ka'ok xe'ēgnāg putup'ah, xayĩy pēnã'. Kaxĩy.

13 Tu ta' mōg Yeyox xix yāy yōg tik xop, tu mĩpkox hã' mōxaha', tu ta' mōg, tu kōnāg xexka xak.

Paniye xop yōg pām tokatokgã'ax xix 'Enot yōg

14 Ha Yeyox yōg tik xop yōg pām 'ũm xip'ah, yā' xaxok. Yā pām puxet xip mĩpkox kopah, 15 ha Yeyox te:

—Pa 'ātix. 'Ūkummuk Paniye xop yōg pām yōg tokatokgã'ax xix 'Enot yōg. Kaxĩy. Yā 'ap tokatokgã'ax 'aktux'ah, pa yā 'üyōg hāmyūmmūgã'ax.

16 Ha Yeyox yōg tik xop te yāy mūtik hām'aktux punethok, tu:

—Hamũn. Yūmũ yōg pām 'ũm xip'ah, yĩy ta nōm 'aktux. Kaxĩy.

17 Ha Yeyox te' xupak, tu:

—Teptu yāy mūtik hām'aktux pām 'ũm xip'ah? 'Ok 'āxop te' yūmmūg 'ohnāg yōgnũ hām'aktux? Texĩy 'āp-tox ka'ok? 18 'Āpa te hāmpēnã 'ohnāg, xix 'āyĩpkox te hām'āpak 'ohnāg. 'Ok 'ūxutigāhã 19 'āte pām te' 5 koxip, nũy tikmũ'ũn te' 5.000 pu' popmã'? 'Ūmã kux, ha pām yāgnāg xe' pip, manax hã nũ'xip. 'Āxop te manax xohix texĩy pop? Kaxĩy.

Ha!:

—12. Kaxīy.

²⁰Ha Yeyox te xe:

—'Āte pām te' 7 koxip, nūy tikmũ'ūn te' 4.000 pu' popmã'. 'Ūmã kux, ha pām yāgnāg xe' pip, manax hã nũ'xip. 'Āxop te manax xohix texīy pop? Kaxīy. Ha':

—7. Kaxīy.

²¹Ha Yeyox te:

—'Ok 'āxop te hāmyūmmūg nōmhã'? Kaxīy.

Yeyox xix tik pa hok Metxax tu'

²²Tu ta' mōg Yeyox xix yāy yōg tik xop, tu mōktu' mōxaha xiptuxexka Metxax tu', ha ta' nūn tikmũ'ūn, tu tik pa hok nūnnāhã', tu Yeyox tu' xak, puyīy 'ūyīm xex tik yīmũ', nūy hittupmã'. ²³Ha Yeyox te' nōy yīm mūg, tu ta' mōg tik mūtik tikmũ'ūn xohix kūnāpa', tu yīy'pu'īn tik pa kopah, tu nōy yīmũ yāy yīm xex, tu:

—'Ok hāpxop pēnāhã'? Kaxīy.

²⁴Ha tik te hāmpēnāhã', tu:

—'Āte' pēnāhã tihik, pa yā mīm te hāpkumep putuk. Kaxīy.

²⁵Ha Yeyox te xe yāy yīm xex tik pa yīmũ', ha tik te hāmpēnã mō'ka'ok, tu hāmpēnã max xe'ēgnāg. Yā' hittup. ²⁶Ha Yeyox te tik xat, pu' pet ha mōg, puyīy xiptuxexka tu mōg hok.

Pet te hām'āktux max

²⁷Tu ta' mōg Yeyox xix yāy yōg tik xop tu xiptuxexka Pinip yōg Xeyanet tu'. Yeyox te tik pu hām'āktux, hu:

—Putep xuktux tikmũ'ūn? 'Ū'ūm 'ūgmūn? Kaxīy.

²⁸Ha tik te:

—Yā' yāg te: “Yā Yoām, nōm tep-tox pix.” Kaxīy. Ha ta' yāg nōy te: “Yā 'Enit.” Kaxīy. Ha ta' yāg nōy te: “Yā nōm te Topa pupi hām'āktux.” Kaxīy.

²⁹Ha Yeyox te:

—Xix 'āxop, putep xuktux 'āxop, 'ū'ūm 'ūgmūn? Kaxīy.

Ha Pet te:

—Yā Topa te 'āyāyikutnāhã'. Kaxīy.

³⁰Ha Yeyox te tik xat, puyīy nōm 'āktux hok.

Yeyox te' xuktux 'ūxok putup, tu putpu' hip-tup

³¹Tu ta hām'āktux Yeyox te yāy yōg tik xop pu, tu:

—'Ūgmūn, yā Tikmũ'ūn Kutok, tuk xūy xekap-tup, yā Yoneo xop yōg xexka xop tek putup nōg putup, xix 'āmānex xexka xop te', xix tik te hāmyūmmūg xop te', tu' nōy xat putup, puyīy 'ūkputex. 'Ūkxok xe'e putup, pa 'āmnīy tikoyuk nōg, 'ihã putpuk hip-tup. Kaxīy.

³²Yā hām'āktux xe'e Yeyox te', ha Pet te:

—'Āmhok. Kaxīy hok! Kaxīy.

³³Ha Yeyox yōkânām, nūy yāy yōg tik xop pēnā', nūy Pet pu hām'āktux, hu:
—'Ōg hām'āktux'ax yā Hāmġāyāgnāg yōg. 'Āpu 'ūkxāmpa mōg! Xate hāmpe'āpaxex, yā tikmū'ūn te hāmpe'paxex putuk, yā 'ap Topa te hāmpe'paxex putuk'ah. Kaxīy.

³⁴Tu ta tikmū'ūn xānāhā Yeyox te, xix yāy yōg tik xop xānāhā', ha' nūn, ha Yeyox te:

—Tikmū'ūn tek mūn mūtik hāpkumep putup, puxix yāy kutōgnāg pe'paxex, puxix yāy yōg putup'ax mīy 'ohnāg, nūy 'āmnīy xohix hā' yāy yōg mīpkupnix tat, nūy xūy, nūy 'ūkxūy putuk, tuk mūn mūtik hāpkumep putup nōmhā'. ³⁵Ha tikmū'ūn te' yāy xaxok hok, puxix tu' hi xe'e 'ohnāg, pa tikmū'ūn xok 'ūgmūn hah, puxix tu hip-tup mōkuma' mōg, tu hi kux 'ohnāg. ³⁶Teptu hām xexka yōg hāpxop xohix pop, pāyā' xok? 'Ūp-texop, tu' xok, tu hāpxop xohix xaxok, 'ūxok tu', puxix' hok xe'ēgnāg. ³⁷Ok max, pu tikmū'ūn putexop xexkah, tu hām xexka yōg tayūmak xohix xexka pop, pa' xok? 'A' max'ah. Yā' xok, tu tayūmak xohix xaxok, tu hok xe'ēgnāg, ha tayūmak xohix te tikmū'ūn putpu' hinnā hok. ³⁸Tikmū'ūn tek mūn hā yāyhāhup, xix yōgnū hām'āktux ha yāyhāhup, yā 'ūnōy xop pu yāyhāhup, hu: "Agmūn Yeyox yōg'ah." Kaxīy. Kōpxix 'āte nōm hā yāyhāhup, 'ūyānān tu'. 'Ātak Topa pu 'āte nōm xop hā yāyhāhup, 'īhāg nūn, tu: "Ōhōm 'a' yōg'ah." Kaxīy. 'īhāg xexka xe'ēgnāg nūn 'ātak Topa putuk, xix pexkox yōg nū'pok xop putuk.

9 ¹Tu ta xe hām'āktux Yeyox te, hu:

—'Āte xa hām'āktux, yā' pip tikmū'ūn nūnteh, tu xakix hāmāxap'ah, pa' pēnāp-tup hāmāxap Topa te yāy yōg tikmū'ūn xat xe'e putup, ha' yīpkox pip putup. Kaxīy.

Yeyox, xix Mōyyex, xix 'Enit

²Ta 'āmnīy xohix te' 6 nōg, 'īhā' mōg Yeyox, tu Pet mōgāhā', xix Tiak, xix Yoām, tu' nōy mōgā 'ohnāg, tu' mōg yīktix tox tu', tu' mōxaha', ha' xip Yeyox tik keppah, tu yāyhā kuyānām putuk, ³ha' topixxax yāyhā 'ūmnok tūmnāg, tu yōg kuyānām pip. Yā tikmū'ūn te topixxax pix hā kaxīy yūmmūg 'ohnāg. ⁴Ha tik tikoyuk te' pēnāhā 'Enit te Yeyox mūtik hām'āktux, xix Mōyyex te', ⁵ha Pet te Yeyox pu hām'āktux, hu:

—Yāyā, yā' max yūmmūg pip nūnteh. 'Ūgmū'āte xa' mīy putup 'āpetnāg, yā 'ōgnū', xix Mōyyex yōg, xix 'Enit yōg. Kaxīy.

⁶Yā' kuxa nōg tihik, yīy hām'āktux hitop Pet te'. ⁷Hāpxip 'īhā' nūn hāmġōy xexkah, nūktu kuyānām mō'nīy, ha Topa te hām'āktux hāmġōy xexka kopah, hu:
—Yā 'ūgkutok pit nō'ōm. 'Āte mō'yāy xe'ēgnāg. 'Āpu 'ūyōg hām'āktux 'āpax! Kaxīy.

⁸Ha tik te yāy yīmap pēnāhā mō'ka'ok, pa Yeyox puxet pēnāhā'. Yā' nōy pip'ah.

⁹Tu ta yīktix hā kukpa yīxohoh Yeyox xix tihik, ha Yeyox te:

—'Āpu hāmpe'nā'ax 'āktux hok. Nāy. 'Ūgmūn Tikmū'ūn Kutok te putpuk hip-tup, ha nōmhā nōm 'āktux putup. Kaxīy.

¹⁰Ha tik te nōm 'āktux 'ohnāg, pa yāy yīkopit, hu:

—Putep xuktux 'ũputpu' hip-tup? Kaxĩy.

¹¹ Tu Yeyox pu yĩkopit, hu:

—Teptu tik te hãmyũmmũg xop te hãm'ãktux 'Enit nũn putup hãmãxap? Kaxĩy.

¹² Ha Yeyox te:

—Hamũn, 'Enit nũn hãmãxap, nũy hãmmaxnã'. Pa Topa tappet tu hãm'ãktux 'ũgmũn Tikmũ'ũn Kutok xũy putup, ha tikmũ'ũn tek putup nõg putup, ¹³ pa 'ãte xa hãm'ãktux, hõmã yã' nũn 'Enit nũnteh, ha tikmũ'ũn te' kute'ex kummuk pax. Yã hõmã Topa tappet tu hãm'ãktux, hu:

—Tikmũ'ũn te 'Enit kute'ex kummuk putup. Kaxĩy.

Yeyox te kaxop hittupmãhã'

¹⁴ Ũpip Yeyox yõg tik xop, tu tik te hãmyũmmũg xop mũtik hãm'ãktux, ¹⁵ ha tikmũ'ũn xohix pip 'ũyĩmap, tu Yeyox pãnãhã', hu' nũn, nũy Yeyox mũtik hãm'ãktux. ¹⁶ Ha Yeyox te yãy yõg tik xop pu hãm'ãktux, hu:

—Putep 'ãktux 'ãxop yãy mũtik? Kaxĩy.

¹⁷ Ha ta' xip tihik tikmũ'ũn kopah, tu:

—Notot, 'ãte yãy kutok pit nũnnãhã', yã' kopa' xip yãmĩy kummuk, ha 'ũgkutok te hãm'ãktux yũmmũg 'ohnãg. ¹⁸ Yãmĩy kũmmuk te' mũkpax, ha hãm tu mõ'yõnpax, ha' yĩkox hã' konnoppax, tu' xox hã' nõy nahatpax, hu' pu'uk 'ũgkutok. Ha 'ãte yãy kutok nũnnãhã, puyĩy 'õgnũ tik xop yãmĩy kummuk xut, pa' xut yũmmũg 'ohnãg. Kaxĩy.

¹⁹ Ha Yeyox te:

—Yã tik kuxa mãm kutõgnãg 'ũgkopah! 'Ãmnĩy xohix texĩy hãg nox xip'ax 'ãxop mũtik, xayĩy 'ãkuxa mãm? 'Ãmnĩy xohix texĩy hã 'ãte 'õg hãpkummuk hã tot putup? 'Ãpu' nũnnã 'ãk-tok. Kaxĩy.

²⁰ Yã' nũnnãhã', ha yãmĩy kummuk te Yeyox pãnãhã', tu kaxop yãy nuhugã ka'ok, ha' nãhã', tu' yõkanãm nã' mõg, tu' yĩkox hã konnop. ²¹ Ha Yeyox te 'ãtak pu hãm'ãktux, hu:

—Hãmyãxatamuk xohix texĩy hã' kummuk hã kaxĩy? Kaxĩy.

Ha 'ãtak te:

—Yã hõmã yã' pu'ũgnãg xix hõnhã'. ²² Yã yãmĩy kummuk te mõ nõy yõn punethok kuxap kopah, xix kõnãg kopah, nũy putex. Xate hãpxopmã yũmmũg, hu tak mũ'ã teh. 'Ãpu 'ũgmũg kuxa ka'. Kaxĩy.

²³ Ha Yeyox te:

—'Ok 'ãte xa hãpxopmã yũmmũg? 'Ok 'ãkuxa yũm ka'ok? Yã 'ãte' kuxa mãm ka'ok xop pu hãpxopmã xohix yũmmũg. Kaxĩy.

²⁴ Ha hãm'ãktux ka'ok, hu:

—Yã 'ũgkuxa yũm 'ãkopah. 'Ãpu 'ũgka'ogã', 'ũyĩy 'ũgkuxa yũm ka'ok punethok. Kaxĩy.

²⁵ Ha tikmũ'ũn xohix yĩnnãhã' tu' nũn, ha Yeyox te yãmĩy kummuk xat, hu: Yãmĩy kummuk, xate' nõy yĩpkox hogãhã'. Yãmĩy kummuk, 'ãpep, nũy putpu mõnã hok. Kaxĩy.

²⁶Ha yāmīy kummuk te hām'āktux ka'ok, tu kaxxop yāy nuhugā xexkah, tu ta' mōg, ha ta' pip kaxxop, ha tikmū'ūn te:

—Yā' xok. Kaxīy.

²⁷Pa Yeyox te! nōy yīm hā' mūg, tu' yīm xīnnāhā', hak-nīhā' xip.

²⁸Ha ta' mōg Yeyox, tu mōktu mīptut hā mō'nāhā', ha Yeyox yōg tik xop te:

—Teptuk mū'āte yāmīy kummuk xut yūmmūg 'ohnāg?

²⁹Ha:

—Tikmū'ūn te Topa pu hām'āktux. Hā kaxīy nōm yāmīy kummuk xut. Kaxīy.

Yeyox te xe hām'āktux 'ūxok putup, tu putpu' hip-tup

³⁰Tu ta' mōg Yeyox yāy yōg tik xop mūtik, tu mōktu hāpxexka Ganinet tu hāpkumep. Yeyox te yāy xaptop putup, puyīy tikmū'ūn pēnā hok, ³¹yā yāy yōg tik xop pu hāmyūmmūgāhā', tu:

—Tik te' gāy xop mōgāp-tup, puyīy 'ūgmūy, nūy 'ūkputex, yā Tikmū'ūn Kutok putex, hak xok putup, pa 'āmnīy tikoyuk nōg 'Thā putpuk hip-tup. Kaxīy.

³²Pa tik te Yeyox yōg hām'āktux yūmmūg 'ohnāg, pa' kuxa nōg, hu xe yīkopit 'ohnāg.

Tik 'ūm xexkanām

³³Ta' mōg Yeyox yāy yōg tik xop mūtik, tu mōktu kōmēn Kapānām tu' mōxaha', tu mīptut hā' mōxaha'. Yeyox te tik te 12 xop pu hām'āktux, hu:

—'Āxop te putep yāy mūtik hām'āktux putat kopah? Kaxīy.

³⁴Pa yā' yēy. Yā tik te hām'āktux, hu:

—Tik 'ūm xexkanām Yeyox yōg tik xop kopah? Kaxīy.

³⁵Yeyox yūm, tu' xānāhā yāy yōg tik xop, ha' nūn, ha:

—'Ok xatep-tup, xayīy xexkah? 'Āpu yāy kutōgnāg pe'āpaxeh, nūy nōy pu 'āhām, yā' xohix yōg kāmānat. Kaxīy.

³⁶Yeyox te kaxxop paha', tu tik xop kopa' xix, tu' nōy yīmū' yīm xex, tu:

³⁷—Tikmū'ūn 'ūm te kaxxop te kaxīy putup, nūy kaxxop pēnā', 'ūkputuppax tu'. Yā nōm tek putup kamah. Tikmū'ūn 'ūm tek putup, yā Topap-tup kamah, yā nōm te nūgkutnāhā'. Kaxīy.

Tikmū'ūn te yūmūg hā' gāy 'ohnāg, puxix yūmūg hā xape'

³⁸Ha Yoām te:

—Yāyā', 'Ūgmū'āte' pēnāhā tihik, ha yāmīy kummuk mōy. Tute: “Yeyox te 'ā yāy 'āxet'ax hōm, 'ūyīy yāmīy kummuk mōy. Yāmīy kummuk, 'āpep!” Kaxīy.

Hak mū'āte:

—“Āmhok! 'Ūmōy hok!” Kaxīy.

Yā tik xip'ah 'ūgmūg xop kopah. Kaxīy.

³⁹Ha Yeyox te:

—Kaxiy hok. Yã' max. 'Áte yã 'ãxet'ax hõm, puyiy yãmiy kummuk mõy, puxix tik 'ügün 'ãktux kummuk putup'ah. ⁴⁰Yã yümüg hã' gãy 'ohnãg, puxix yümüg hã xape tikmũ'ün. ⁴¹'Ápu 'üxaxok hok, tikmũ'ün te xa kõnãg tat, 'ükuxa mãm 'ügkopah tu', puxix Topa nõm hã maxnã'. Kaxiy.

Pa 'ãtix. Hãpkummuk mïy hok

⁴²Tu xe:

—Tikmũ'ün 'üm te' kuxyãhã kaxxop kutõgnãg kuxa yüm'ax 'ügkopah. Yã' max, pu nõm kummuk xop xuknĩkup tu mikaxxap xexka hiy poxit hã, nüy kõnãg xexka kopa mõ'yõn. ⁴³Paxpu 'ãyim te 'ãkummugã', xayiy hãpkummuk mïy, 'ãpu kuyut, nüy 'üxak, nüy putyõn. Yã' max, pexkox hã mõnãy 'ãyim puxet hã. Pa' kummuk, 'ünõy te 'ãxix kuxap kopah, ha 'ãyim tix pip. Yã kuxap xok 'ohnãg. ⁴⁴Yã 'ük-tox nõy nã' mõg putup hãpxop xohix, ha kuxap xok 'ohnãg. ⁴⁵Paxpu 'ãpata te 'ãkummugã, xayiy hãpkummuk mïy, 'ãpu kuyut, nüy 'üxak, nüy putyõn. Yã' max, pexkox hã mõnãy 'ãpata puxet hã. Pa' kummuk, 'ünõy te 'ãxix kuxap kopah, ha 'ãpata tix pip. ⁴⁶Yã 'ük-tox nõy nã' mõg putup hãpxop xohix, ha kuxap xok 'ohnãg. ⁴⁷Paxpu 'ãpa te 'ãkummugã, xayiy hãpkummuk mïy, 'ãpu 'üxut, nüy putyõn. Yã' max, Topa yõg xop hã mõnãy 'ãpa puxet hã. Pa' kummuk, 'ünõy te 'ãxix kuxap kopah, ha 'ãpa tix pip. ⁴⁸Yã 'ük-tox nõy nã' mõg putup hãpxop xohix, ha kuxap xok 'ohnãg.

⁴⁹Kuxap te pipkup kopit, pe' max pe' kummuk. Hã kaxiy Topa te tikmũ'ün yõg hãpxopmã'ax kopit putup. ⁵⁰Tikmũ'ün te' putyõn 'ãmotxuxpex kummuk. Hã kaxiy Topa te hãpkummuk mïy xop putyõn putup. Pa 'ãpu hãmmax mïy, nüy tikmũ'ün pu hãmaxnã'. Kaxiy.

'Ok 'ĩpxox te' xetut nĩm, pu' kummuk

10 ¹Tu ta' mõg Yeyox hãpxexka Yonex tu', tu kõnãg kox Yohnãm xak. Ha ta' yãy tu nũ'nãhã tikmũ'ün xohix Yeyox yĩmãp 'üxehet, ha xe tikmũ'ün pu hãmyümmügãhã'. Yã Yeyox te hãmyümmügã pax. ²Ha ta' nũn Paniye xop, tup-tup, puyiy Yeyox koit, tu:

—Putep kax'ãmi yümü yõg xat'ax yõg tappet tu? Topa te putep xat? 'Ok xat, pu tik xetut nĩm? Kaxiy.

³Ha Yeyox te:

—Mõyyex te putep xat? Kaxiy.

⁴Ha:

—Mõyyex te' xat, pu tik tappet kax'ãmi, nüy xetut nĩm, puyiy xetut mõg. Kaxiy.

⁵Ha Yeyox te:

—Hamũn. Hõmã tikmũ'ün yĩpkox 'ohnãg, yiy' xat'ax te kaxiy kax'ãmi'.

⁶Pa 'ãmhok. Hõmã Topa te' mïy hãhãm xix hãpxop xohix, 'ihã Topa yõg tappet te: “Topa te' mïy tihik xix 'ühün, 7yiy ta tik te' tak nĩm xi' tut, nüy xetut mütik yãytax, ⁸ha nõmhãp-xet. Yã' tix'ah 'ĩpxox xix xetut, yãp-xet.

⁹Yã Topa te yãytagãhã', ha tikmũ'ün te nõm nĩmmãhã', pu' kummuk. Kaxiy.

¹⁰Ta' mōg Yeyox xix yāy yōg xop, tu nūktu mĩptut hā' mōxaha', ha Yeyox yōg tik xop te:

—Putep xuktux hato'ah? Kaxīy.

¹¹Ha Yeyox te:

—Īpxox te' xetut nīm, nūy nōy mūy, yā hāpkummuk mīy. Yā' nōy hā' xupxet. ¹²Ha ta' xetut te 'īpxox nīm, nūy nōy mūy, hā hāpkummuk mīy. Yā' nōy hā' xupxet. Kaxīy.

Yeyox xix kaxxop

¹³Hāpxip 'īhā tikmū'ūn te kaxxop nūnnāhā Yeyox tu', puyīy Yeyox kaxop pu hāmaxnā', pa Yeyox yōg tik xop te:

—'Āmhok, 'ūnūnnā hok. Kaxīy.

¹⁴Pa Yeyox te' xupak, tup-tup nōg, tu:

—'Ūtux, puk ha nū' kaxxop. Hām'āktux hok, hu: “'Ūnūnnā hok.” Kaxīy. Yā Topa te yāy yōg tikmū'ūn xat, ha' yīpkox pīp. Yā nōm xop te kaxxop putuk. ¹⁵'Āte xa hāpxe'e 'āktux: Kaxxop yīpkox pīp Topa xat'ax pu', ha Topa tep-tup, pu tikmū'ūn yīpkox pīp kamah, kaxxop putuk, nūy Topa yōg tikmū'ūn kopa' pī'. Kaxīy.

¹⁶Yeyox te kaxxop yīmū' yīm xex, tu kaxxop pu hāmaxnāhā'.

Tik 'ūp-texop xexka'

¹⁷Tu ta xe' mōg Yeyox, tu' mōg kutōgnāg, ha ta nū'xupaha tihik, tu nūktu Yeyox keppa' kopaxux hā' xip, tu:

—Notot max, 'āte putep mūn mīy putup, nūy hi xe'ēgnāg mōkumakmōg, ha' kux 'ohnāg? Kaxīy.

¹⁸Ha Yeyox te

—Teptu xate: “Notot max?” Kaxīy. Yā Topa 'ūmax, yāp-xet 'ūmax, ha ta' nōy max 'ohnāg. ¹⁹Xate' yūmmūg Topa te' xat, hu: “Tikmū'ūn putex hok, 'ānōy hā xupxet hok, hām xupxet hok, 'ānōy hā kupex kummuk hok, koit hok, 'ōg 'ātak tu 'āyīpkox pī' xix 'ātut tu'.” Kaxīy.

²⁰Ha tik te:

—Notot, 'āte' mīy xohix. Yā hōmā 'ūgmūn yā kaxxop xix hōnhā hā' mīy xohix. Kaxīy.

²¹Ha Yeyox te tik pēnāhā', tu mō'yāy xe'ēgnāg, tu:

—Xate hāpxopmā'ax puxet xip'ax hok. Mōg, nūy 'ōg hāpxop xohix hāmenex, nūy tayūmak pop, nūy 'ūhok xop pu' nīm, nūy pī' 'ōg hāpxop max xe'ēgnāg pexkox kopah, nūy nū', nūy 'ūkpe mōg. Kaxīy.

²²Yā tik te hām'āktux 'āpak, tu' yēy, tu' kuxa hittup 'ohnāg, tu ta' mōg nūpeheh. Yā 'ūp-texop xexkānām.

²³Ha Yeyox te yāy yōg tik xop te' yīmap pēnāhā', tu:

—Yā 'ūp-texop xexka kutīgnāg te Topa yōg putat hā' mōg, Topa yōg xat'ax pu' yīpkox pīp hok tu'. Kaxīy.

²⁴Ha Yeyox yōg tik xop te' yēy, ha Yeyox te:

—'Ûgnix mûnôm xop, yã tikmũ'ûn kutîgnãg te Topa yõg putat hã' mõg, nũy Topa yõg xat'ax pu' yîpkox pi'. Yã hãpxopmã ka'ok. ²⁵Xok xexka kãmên te 'ãmuxnãg ta kup kox hã mõ'tat hok, ha tap-texop xexka xop te Topa yõg putat hã mõg 'ohnãg, tu Topa yõg xat'ax pu' yîpkox pip 'ohnãg.

²⁶Ha Yeyox yõg tik xop kuxa te' yêy, tu yãy mûtik hãm'ãktux, hu:

—'Ok Topa te tikmũ'ûn kuxa kummuk xit 'ohnãg? Kaxîy.

²⁷Ha Yeyox te' nõy pênãhã, tu:

—Hamûn, Topa tep-texop xexka xop kuxa kummuk xit yûmmûg, nũy kuxa max mõ'tat 'üyânân tu!, pa yã tikmũ'ûn te kuxa kummuk xit yûmmûg 'ohnãg. Kaxîy.

²⁸Ha Pet te:

—Xate' yûmmûg, 'ügmũ'ãte yãy yõg hãpxop xohix nîm, nũy 'ãpek mûg mõg. Kaxîy.

²⁹Ha Yeyox te:

—'Ãte xa hãpxe'e 'ãktux, tikmũ'ûn te' yãy pet nîm, nũy 'ükpe mõg, pe' taknõy nîm, pe' pit, pe' tutnõy, pe' hex, pe' tut, pe' tak, pek-tok, nũy 'ükpe mõg, nũy 'ükpupi hãpxopmã', nũy Topa yõg hãm'ãpak max'ax 'ãktux. ³⁰Ha Topa te nôm pu popmãp-tup nũnte hãm xexka tu!, yã' popmãp-tup 'ûpet xohix te' 100, xi' taknõy 100, xi' pit 100, xi' tutnõy 100, xi' hex 100, xi' tut 100, xik-tok 100, xix hãm te' 100, ha tikmũ'ûn te nôm kute'ex kummuk xexkap-tup. Hãpxip 'ihã Topa te nôm hînnãp-tup, puyîy hi xe'ëgnãg mókuma' mõg, ha' kux 'ohnãg. ³¹Yã tikmũ'ûn te mãxap yãyhã ka'ax putup, ha ta ka'ax xop yãyhã mãxap putup. Kaxîy.

Yeyox te xe hãm'ãktux 'ûxok putup, tu putpu' hip-tup

³²Tu ta' mõg Yeyox xix yãy yõg tik xop, tu putat hã' mõg kômên Yenoyanên tu!, ha Yeyox yõg tik xop te Yeyox pe' mõg, ha tikmũ'ûn te' pe' mõg kamah, ha Yeyox yõg tik xop kuxa te' yêy, ha tikmũ'ûn kuxa nõg, ha Yeyox te yãy yõg tik xop mõgãhã', tu tikmũ'ûn nîm, tu:

³³—'Ûyûmmûg? Yûmûg mõg kômên Yenoyanên tu!, ha ta 'õnte tik te 'ãmãnex xexka xop mõgãp-tup xix tik te hãmýûmmûg xop mõgãp-tup, puyîy 'ügmûn Tikmũ'ûn Kutok müy, tu hãm'ãktux putup, hu:

—'Äpu 'ûp-tex! Kaxîy.

Tu puknõg xop puk hõm putup, ³⁴hak mûn 'ãktux kummuk putup, tu' yîyputup putup, tuk kix putup, tuk putex putup, hak xok putup. Pa 'ãmniy tikoyuk nõg putup, 'ihã putpuk hip-tup. Kaxîy.

Tiak tep-tup hãpxop xix Yoãm te'

³⁵Hãpxip 'ihã' nûn Yemeneo kutok Tiak xix Yoãm, nũktu Yeyox pu hãm'ãktux, hu:

—Yãyã, 'ügmũ'ãtep-tup, xayîy hãpxopmã'. Kaxîy.

³⁶Ha Yeyox te:

—Putep putup? Kaxîy.

³⁷Ha:

—Hãpxip 'ihã 'âyũm putup 'uxexka yõg mĩmpe yũm'ax xe'ẽgnãg yĩmũ', nũy yã yõg tikmũ'ũn xat. 'Ãpuk mũg xat, 'ũ mãm yãpxet 'ãyim xe'e ha xi' nõy 'ãyim xax ha 'õnteh. Kaxĩy.

³⁸Ha Yeyox te:

—'Ãxop te' yũmmũg 'ohnãg 'ãxop te nõm putup. Hãpxip 'ihã tikmũ'ũn tek xũygãp-tup, tuk kute'ex kũmmuk putup, tup-tex putup. 'Ok 'ãxop te' xũy hã kaxĩy tot kamah? Kaxĩy.

³⁹Ha:

—Yã hamũn. Kaxĩy.

Ha Yeyox te:

—Yã hamũn. Tikmũ'ũn te 'ãxop xũygãp-tup, tu 'ãxop kute'ex kummuk putup, tu 'ãxop kix putup, ⁴⁰pa 'a 'ãte' xat'ah, pa Topa te' xat, pu tikmũ'ũn mãm 'ũgyĩm xe'e ha xix 'ũgyĩm xax hah, yã 'ũnõy yõg xip'ax. Kaxĩy.

⁴¹Ha ta' xupak Yeyox yõg tik te 10 te', hu' gãy.

⁴²Ha Yeyox te yã yõg tik xohix xãnãhã', yĩy ta' nũn. Yeyox te:

—'Ãxop te' yũmmũg, 'ũxat'ax xop te' xat pax 'ũkuxa mãm kũnãpa pip xop. ⁴³Pa 'ãxop kopa hã kaxĩy yã' kummuk. 'Ãpu Topa kopa kuxa mãm xop xat pax hok. 'Ok xatep-tup, xayĩy 'ãxexka'? 'Ãpu tikmũ'ũn pu hãpxopmã max, yã tikmũ'ũn yõg kãmãnat max putuk. ⁴⁴'Ok xatep-tup, xayĩy 'ãxexka'? 'Ãpu tikmũ'ũn xohix yõg kãmãnat putuk. ⁴⁵Yã 'ũgmũn Tikmũ'ũn Kutok nũn nũnte hãm xexka tu', nũy tikmũ'ũn pu hãpxopmã max, yã tikmũ'ũn yõg kãmãnat putuk. 'ũgnũn, nũy tikmũ'ũn pupik xok, nũy tikmũ'ũn xohix kuxa kummuk xit, nũy kuxa max mõ'tat, 'ũyãnãn tu'. Kaxĩy.

Yeyox xix Matimẽo yã pa hok

⁴⁶Tu ta' nũn Yeyox xix yã yõg tik xop, tu nũktu' mõxaha kãmẽn Yenikot tu'. 'ũpip kãmẽn tu', tu ta' mõg kãmẽn kũnãpa', ha ta' mõg tikmũ'ũn xohix kamah, pa' xip tihik, yã pa hok, yã' xuxet'ax Matimẽo, yã Timeo kutok. Tik yũm putat pukah, tu tayũmak xak, puyĩy tikmũ'ũn tayũmak nĩm. ⁴⁷Ha tikmũ'ũn te hãm'ãktux Yeyox te kãmẽn Nãyane tu' nũn, ha Matimẽo te' xupak, tu hãm'ãktux ka'ok, hu:

—Yeyox, yã Namix mõkputox, 'ãpu 'ũgmũn kuxa ka'! Kaxĩy.

⁴⁸Ha tikmũ'ũn te:

—'Ãyĩy hok! Kaxĩy.

Pa tik yĩy ka'ok nõy nã' mõg, hu:

—Namix mõkputox, 'ãpu 'ũgmũn kuxa ka'! Kaxĩy.

⁴⁹Ha Yeyox hup, tu:

—'Ãpu tik pa hok nũnnã'. Kaxĩy.

Ha tikmũ'ũn te tik pu hãm'ãktux, hu:

—'Ãkuxa nõg hok. 'Ãpu 'ãyok. Tute 'ãxãnãhã', xa nũ'! Kaxĩy.

⁵⁰Ha Matimẽo te yã kayak putxok, tu pepi' xip, tu ta' mõg Yeyox hah, tu mõktu' xupep.

⁵¹Ha Yeyox te:

—Putep putup, 'ü mĩy? Kaxĩy.

Ha:

—Notot, 'ātep-tup, 'üyĩy hāmpēnā 'ūxeheh. Kaxĩy.

⁵²Ha Yeyox te:

—Mōg! 'Āpa hittup, 'ākuxa yūm ka'ok 'ūgkopa hah. Kaxĩy.

Hāpxip 'ohnāg 'īhā Matimēo te xe hāmpēnāhā, tu ta' mōg Yeyox peheh.

Yeyox te kōmēn Yenoyanēn tu' nūn

11 ¹Ta xe' nūn Yeyox xix yāy yōg tik xop, tu nūktu kōmēn Yenoyanēn yīka' pip yīktix 'Onimet Kup tu' xiptuxexka Metpaye yīka' xix xiptuxexka Metān yīka'. Ha Yeyox te yāy yōg xop xat, ²hu:

—Mōg xiptuxexka tu'. Xiptuxexka tu 'āmōxap-tup, pa' xip putup yomēnnāg, yā' hīy, yā tikmū'ūn te nōm yīmū' yūm 'ohnāg. 'Āpu 'ūko'a', nūy nūnnā'. ³Ka tikmū'ūn te: “Teptu 'ūmōgāhā?” Kaxĩy. Ha 'āxop te hām'āktux putup, hu: “Yā 'ūgmūg xuxyā tep-tup. Hāpxip 'īhā' nūnnāp-tup 'ūgmū'āte.” Kaxĩy.

⁴Ha ta' mōg, pa' xip yomēnnāg, 'ūhīy hāmyīkox yīka'. Tik te' ko'a', ⁵ha ta' nūn tikmū'ūn, tu:

—Teptu yomēn ko'a'? Kaxĩy.

⁶Ha tik te:

—Yā 'ūgmūg xuxyā tep-tup. Hāpxip 'īhā' nūnnāp-tup 'ūgmū'āte'. Kaxĩy.

Ha tikmū'ūn te:

—'Āpu yomēnnāg mōgā'. Kaxĩy.

⁷Ha ta' mōg tihik, tu yomēnnāg nūnnāhā Yeyox tu', tu yāy yōg kayak xex yomēnnāg yīmū', ha Yeyox te nōm yīmū' yūm. ⁸Ha ta' tikmū'ūn xohix te putat yīmū' yāy yōg kayak xatat ha' mōg, ha ta' tikmū'ūn xohix nōy te mīm tu' mep mīmmāg, tu nōm putat yīmū' xatat ha' mōg. ⁹Ha ta' mōg tikmū'ūn Yeyox keppah, ha ta' mōg tikmū'ūn nōy Yeyox peheh. 'Ūxohix te hām'āktux ka'ok, hu:

—Yā' max xe'ēgnāg Topah! Topa te nū'ākutnāhā, tu 'āka'ogāhā! ¹⁰Yā' max xe'ēgnāg, xate yāy yōg tikmū'ūn xat kōnāmāhā, hā yīpkox pip. Xate mōnāyxop Namix putuk, yā tikmū'ūn xat putup. Yā' max xe'ēgnāg Topah! Kaxĩy.

¹¹'Ūnūn Yeyox, tu nūktu' xupep kōmēn Yenoyanēn tu', tu ta' mōg, tu mōktu Topa pet xexka hā mō'nāhā, tu hāpxop xohix yīmap pēnāhā. 'Āmāxak'ax ha ta' mōg Yeyox xix yāy yōg tik te ¹²xop, tu nūktu xiptuxexka Metān hā' moxaha'.

Piget kup

¹²Hāptup ha ta' mōg Yeyox xix yāy yōg tik xop, ha Yeyox putup xūy, ¹³pa hāptox tu' pēnāhā piget kup, ha yōg mīxux punethok, ha ta' mōg, nūy piget ta' pēnā', tu' mōg, pa piget ta' pēnā' 'ohnāg, yā mīxux pēnāhā', yā piget ta' yōg mō'āgmūg'ah, ¹⁴ha Yeyox te piget kup pu hām'āktux, hu:

—Tikmū'ūn te 'ōg mīnta xe māp-tup'ah. Kaxĩy.

Ha Yeyox yōg tik xop te' xupak.

Yeyox xip Topa pet xexka tu'

¹⁵ 'Ũnün Yeyox xix yāy yōg tik xop, tu nūktu' mōxaha kōmēn Yenoyanēn tu', tu ta' mōg Topa pet xexka tu', ha' nūn Yeyox, pa' pip tikmū'ūn, tu' nōmenex, tu' pop tayūmak Topa pet xexka kopah, ha Yeyox te' xohix papuk, ha ta' mōg hāptopah, ha ta' mām tikmū'ūn, tu tāyūmak nōy yānān, ha Yeyox te yōg mīmpe xit'ax putxok, ha ta' mām tikmū'ūn, tu kuxxuxtut hāmenex, ha Yeyox te yōg mīmpe yūm'ax putxok, ¹⁶ tu' xat, pu Topa pet xexka kopa hāpxop tat hok, ¹⁷ tu tikmū'ūn pu hāmyūmmūgāhā', hu:

—Topa yōg tappet tu' kax'āmi Topa yōg hām'āktux. Yā Topa te: “'Ūkpet 'āxet'ax putup 'ūhep xop xohix yōg Topa pu hām'āktux'ax pet.” Kaxīy. Pa 'āxop te' mīy xupxet'ax pet, nūy yāy xaptop! Kaxīy.

¹⁸ Yā 'āmānex xexka xop te' xupak xix tik te hāmyūmmūg te', tu hāmpē'paxex texīy Yeyox putex, pa' yīpkutuk, yā tikmū'ūn tep-tup pax Yeyox yōg hāmyūmmūg'ax.

¹⁹ 'Āmāxak ha ta' mōg Yeyox xix yāy yōg tik xop kōmēn kūnāpa'.

'Āpu 'ākuxa mām Topa kopah

²⁰ Hāptup ha ta' mōg Yeyox xix yāy yōg tik xop, tu piget kup yīka' mōg, tu' pēnāhā', yā' nak piget kup, yā' xexka 'ūnak, ²¹ ha Pet te' xutigāhā', tu Yeyox pu hām'āktux, hu:

—Notot, pēnā'. Hōmā xate piget kup mānōg, ha ta hōnhā' nak. Kaxīy.

²² Ha Yeyox te:

'Ākuxa mām Topa kopah, ²³ hu ta yīktix pu hām'āktux, hu: “'Āpep, nūy mōg kōnāg xexka tu'”, kaxīy, puxix' mōg putup kōnāg xexka tu'. 'Ākuxa mām ka'ok Topa kopah, puxix mōg kōnāg xexka tu'. ²⁴ Yā 'āte xa hām'āktux: 'Āxop te Topa pu hām'āktux, nūy tatu hāpxop 'ūm xak. 'Āpu 'ākuxa mām Topa kopah, nūy yūmmūg xe'e Topa te xa' popmāp-tup, ha Topa te xa' popmāp-tup 'ūxohix. ²⁵ 'Āxop te Topa pu hām'āktux. 'Āpu 'ūxaxogā', 'ūnōy te 'ākute'ex kummuk. 'Āpu 'ūxaxogā', putu' kux, ha ta pexkox tu Topa te' xaxogap-tup 'ōg hāpkummuk mīy'ax, putu' kux. ²⁶ Xate tikmū'ūn yōg hāpkummuk mīy'ax xaxogā 'ohnāg, puxix 'Ātak pexkox yōg te 'ōg hāpkummuk mīy'ax xaxogā 'ohnāg. Kaxīy.

Tep-te Yeyox pu yāy 'āxet'ax hōm

²⁷ Ta' nūn Yeyox xix yāy yōg tik xop, tu nūktu' mōxaha kōmēn Yenoyanēn tu', tu ta' mōg tu mōktu Topa pet xexka hā' mōxaha', ha ta' nūn 'āmānex xexka xop xix tik te hāmyūmmūg xop, xix Yoneo xop yōg xexka xop, tu nūktu Yeyox pu hām'āktux, hu:

²⁸ —Tep-te xa yāy 'āxet'ax hōm, xayīy hāpxopmā nūhū'? Tep-te' xat, xayīy mīy? Kaxīy.

²⁹ Ha Yeyox te:

—'Ãte xa yĩkopit kamah. 'Ãxop te hãm'ãktux xe'e!, kopxix xa nõm 'ãktux. ³⁰'Ãpu hãm'ãktux: Tep-te Yoãm pu yãy 'ãxet'ax hõm, puyiy tikmũ'ũn putox pix? 'Ok pe Topa te 'ok pe tikmũ'ũn te'? Tep-te' xat? Kaxiy.

³¹Ha yãy mütik hãm'ãktux, hu:

—Yũmũ'ãte hãm'ãktux yã Topah, puxix yĩkopit putup, hu: “Teptu 'ãkuxa mãm 'ohnãg Yoãm kopah?” ³²Pa yũmũ'ate hãm'ãktux yã tikmũ'ũn, puxix xok 'ũm? Kaxiy.

Yã nõm te tikmũ'ũn yĩpkutuk. Yã tikmũ'ũn te hãmpe'paxex Yoãm te Topa pupi hãm'ãktux. ³³Ha:

—'ĩntu', 'ap yũmmũg'ah 'ũgmũ'ãte'. Kaxiy.

Ha Yeyox te:

—Tep-te 'ã yãy 'ãxet'ax hõm, 'ũyiy hãpxopmã nũhũ'? 'Ãte xa nõm 'ãktux putup'ah kamah. Kaxiy.

Kãmãnat kummuk

12 ¹Hãpxip 'ihã Yeyox te tikmũ'ũn pu hãm'ãktux'ax hã hãmyũmmũgãhã', nũy Topa yõg hãpxopmã'ax yũmmũgã', tu:

—Tik yõg mĩnta 'op tox pip hãm xa'ax xexka kopah, tu hãm pak'ax mĩy tu' yĩmap, tu hep tat'ax xexka mĩy, nũy nõm kopa xupyãg mĩy, tu mĩptut tox mĩy, nũy nõm kopa tik xix, puyiy hãpxop xohix pãnã!. Tik te kãmãnat pu' hõm hãm xa'ax, puyiy pãnã!, tu ta' mõg hato'a'. ²Hãpxip 'ihã mĩnta yãy koxuk, ha hãm xa'ax yõg xuxyã te tik nũ'kutnãhã', puyiy mĩnta yõg tayũmak pop, ³ha ta' mõg, pa kãmãnat te tik mũg, tu' kix, tu nũ'kutnãhã', 'ũhok tat. ⁴Ha hãm xa'ax yõg xuxyã te xe tik nõy nũ'kutnãhã', pa kãmãnat xop te nõm hãpkute'ex kummuk kamah, tu tik putox kix. ⁵Ha hãm xa'ax yõg xuxyã te tik nõy nũ'kutnãhã', pa kãmãnat xop tep-tex. Ha xe' punethok mõ'pok, pa kãmãnat xop te yãg kute'ex kummuk, tu' yãg kix, ha' xakix. ⁶Nõmhã' xip yãp-xet, puyiy mõ'kutnã', yã hãm xa'ax yõg xuxyã kutok pit, ha hãm xa'ax yõg xuxyã te hãmpe'paxex hu: “Kãmãnat tek-tok 'ãpak putup.” Kaxiy, tuk-tok nũ'kutnãhã', ⁷pa kãmãnat xop te yãy mütik hãm'ãktux, hu: “Yã hãm xa'ax yõg xuxyãk-tok. 'Ãpu yũmũp-tex, nũy pa hãm xa'ax, nũy yũmũ yõg hãm xa'ax.” Kaxiy.

⁸—Kãmãnat tek-tok mũg, tuptex, tu xok-xax putyõn hãm xa'ax nãpah. Kaxiy.

⁹Tu Yeyox te xe:

—Putep mũn mĩy putup hãm xa'ax yõg xuxyã nõmhã'? Yã' mõg putup, nũy kãmãnat kix, ha' xakixp-tup, ha kãmãnat nõy pu hãm xa'ax hõm putup. ¹⁰'Ok 'ãxop te mõ'kupix Topa yõg tappet tu'. Yã' kax'ãmi, hu: “Mĩptut mĩy'ax te mĩkaxxap paha', tu hãmpe'paxex, yã' kũmmuk, tu' putyõn. Pa 'ãmhok, yã' max xe'ẽgnãg mĩkaxxap, ¹¹Yã Topa te' mĩy, yã' max xe'ẽgnãg!” Kaxiy.

¹²Ha ta' yũmmũg nõmhã Yoneo xop yõg xexka xop te', yã Yeyox te nõm xop 'ãktux. Yã nõm tep-tup, nũy Yeyox kute'ex kummuk, pa 'ãmhok, 'ũmĩy 'ohnãg, yã tikmũ'ũn yĩpkutuk. Yã hãpxop mĩy 'ohnãg, tu ta' mõg hato'a'.

'Ok max gohet pu tayũmak pagok

¹³Hãpxip 'ihã tik te nũ'pok Paniye xop xix 'Enot xop, puyĩy Yeyox koit'ax xak. ¹⁴Õnũn tu nũktu:

—Notot, 'ũgmũ'ãte' yũmmũg xate hãpxe'e 'ãktux, tu tikmũ'ũn yĩpkutuk 'ohnãg. Xate' xexka xop yĩpkutuk 'ohnãg, pa xate tikmũ'ũn pu' yũmmũgãhã Topa te nãm putup. 'Ãpu hãm'ãktux: putep xuktux yũmũ yõg Topa yõg tappet tu'. 'Ok pe' max gohet pu tayũmak tanemãn'ax pagok, yã Hõm xop yõg xat'ax Xet pu pagok? 'Ok pe' kummuk? Kaxĩy.

¹⁵Pa Yeyox te' yũmmũg, tik pa max, pa yã' kuxa kummuk. Yeyox te:

—Teptu 'ãxop te' xak 'ãte' koit. Paxnũ tayũmak 'ãnuk, 'ũ pãnã'. Kaxĩy.

¹⁶Ha ta' mõg, tu putpu' nũnnãhã', ha Yeyox te:

—'Õ'ũm yõg 'ãxet'ax kax'ãmi tayũmuk 'ãnuk tu'? Xix 'ũ'ũm yõg xumix xip tayũmak 'ãnuk tu'?

Ha:

—Yã gohet yõg xat'ax Xet yõg. Kaxĩy.

¹⁷Ha Yeyox te:

—'Ãpu gohet yõg xat'ax pu gohet yõg xat'ax yõg hãpxop pagok. 'Ãpu Topa pu Topa yõg hãpxop pagok kamah. Kaxĩy.

Ha' kuxa te' yey.

Texĩy tikmũ'ũn te putpu' hix

¹⁸Ha ta' nũn Xanuxeo xop, yã Xanuxeo xop te hãmpe'paxex tikmũ'ũn putpu' hip-tup'ah. 'Õnũn, tu nũktu Yeyox pu hãm'ãktux hu:

¹⁹—Notot, hõmã Mõyyex te yũmũ'ã tappet kax'ãmi, hu: “'Õxok tihik, ha ta' xip xetut, pak-tok 'ũm xip'ah. Mõyyex te' xat, tik taknõy te xetut hokyũm mütik yãytaha', pu' max, nũy nõy xok pu' pop kaxxop. ²⁰Hõmã' pip 'ütaknõy xohix te' 7. Tik mãxap te 'ũn mütik yãytaha', pak-tok 'ohnãg, tu' xok. ²¹Ha' taknõy 'ũg-nãy tu te' yãytaha', tuk-tok put 'ohnãg, tu' xok, ha' taknõy yãykote hã kaxĩy kama'. ²²Hã kaxĩy 'ũxohix te' 7 te yãytaha 'ũn mütik, 'ük-tok 'ũm pop 'ohnãg, tu' xakix 'ũxohix. Hãpxip 'ihã' xok kama 'ũhũn. ²³Hãpxip 'ihã Topa te tikmũ'ũn xohix putpu' hĩnnãp-tup, 'ũ'ũm yõg xetut nõmhã'? Yã xohix te' 7 te yãytaha 'ũn mütik! Kaxĩy.

²⁴Ha Yeyox te:

—'Ãxop te hãm yũmmũg 'ohnãg! Texĩy? Yã 'ãxop te' yũmmũg 'ohnãg Topa yõg tappet. 'Ãxop te' yũmmũg 'ohnãg Topa 'ũka'ok xexka'. ²⁵Yã xakix xop putpu' hip-tup. Topa yõg nũ'pok xop te yãyta 'ohnãg pexkox tu'. Hã kaxĩy tikmũ'ũn te yãyta 'ohnãg pexkox tu'. ²⁶Hõmã Mõyyex te' kax'ãmi tappet tu', tu putpu' hĩnnã'ax kax'ãmi!. 'Ok 'ãxop te nãm mõkupix 'ohnãg? Yã 'ũkax'ãmi Topa te mĩm pahok kup puk kopa Mõyyex pu hãm'ãktux, hu: “'Õgmũn yã 'Amanãm yõg Topah, xix 'Iyak yõg, xix Yako yõg.” Kaxĩy. ²⁷Hã kaxĩy Topa te' xuktux 'ap xakix xop yõg Topa'ah, pa yã hi xop yõg. 'Ãxop te hãm yũmmũg 'ohnãg. Kaxĩy.

Topa yög xat'ax xexkanãm

²⁸Ha ta' xip tihik, tu' xip tik te hãmyümmüg xop kopah, tu hãm'ãktux 'ãpak, tu' yümmüg Yeyox te hãm'ãktux max. Tik te Yeyox pu hãm'ãktux, hu: —Topa te tikmũ'ün xat. Xat'ax 'üm xexkanãm? Kaxiy.

²⁹Ha Yeyox te:

—Yã Topa te tikmũ'ün xat, hu: “Iyaet xop, 'ãpu 'üxupax. Yümüg xuxyã yã yümü yög Topa yãp-xet, yã' nõy xip'ah. ³⁰Ãpu 'ãxuxyã Topap-tuppax 'ãkuxa xexka hã xix 'ãkoxuk xexka hã xix 'ãp-tox xexka hã xix 'ög ka'ok'ax xexka hã!” Kaxiy. ³¹Ha Topa te xe tikmũ'ün xat, yã xat'ax 'ük-nãy tu!. Topa te: “'Ãpu 'ãnõy putup pax xate yã putup pax putuk.” Kaxiy. Yã' xat'ax tix 'üxexkanãm, ha ta xat'ax nõy 'üxexka!. Kaxiy.

³²Ha tik te:

—Notot, yã hãm'ãktux max! 'A' koit'ah. Yã' xip Topap-xet, ha ta' nõy 'üm 'ap xip'ah. ³³Yã' max yümü'ãte Topap-tuppax yã kuxa xexka hã xix yãy putox xexka hã xix yãy ka'ok'ax xexka hã. Yã' max kama yümü'ãte yãy nõy putup pax yümü'ãte yãy putup pax putuk. Yã' max xexka yümü'ãte xat'ax tix mĩy nõ'õm, ha ta' max miãx yümü'ãte xokxop mõ'hãp, nũy Topa pu haxyã!. Kaxiy.

³⁴Ha Yeyox te! yümmüg tik te hãmyümmüg, yã hãm'ãktux max. Yeyox te: —Ãxip Topa yög xop yĩka! Topa te nõm xat, ha' yĩpkox pip. Kaxiy. Ha tikmũ'ün kuxa nõg, hu xe hãpxop nõy yĩkopit 'ohnãg.

Topa yög yãyikutnã'ax

³⁵Üxip Yeyox Topa pet xexka tu!, tu tikmũ'ün pu hãm'ãktux, hu: —Teptu tik te hãmyümmüg xop te tikmũ'ün pu' yümmügãhã Topa yög yãyikutnã'ax yã Namix mõkputox? ³⁶Pa Topa Koxuk te Namix kax'ãmiyãhã!, ha tute kax'ãmi!, hu: “Yümüg xuxyã Topa te 'üguxuxyã pu hãm'ãktux, hu: Yühüm 'ügyim xe'e tu!, ha 'ãte puknög gãy xop xix putup 'ãpata yĩkãgnãg.” Kaxiy. ³⁷Yã Namix te: “'Ükxuxyã!” Kaxiy. Yã Topa yög yãyikutnã'ax xãnãhã, hu: “'Ükxuxyã!” Kaxiy. Texiy Topa yög yãyikutnã'ax yã Namix mõkputox? Kaxiy.

Yeyox xix tik te hãmyümmüg xop

Ha tikmũ'ün xohix te Yeyox yög hãm'ãktux putup pax. ³⁸Ha Yeyox te: —Pa 'ãtix, tik te hãmyümmüg xop tep-tup pax, nũy hãpkumep, nũy topixxax xe'ëgnãg ta!, puyiy tikmũ'ün nõm 'ãktux max, yã nõm 'ãpak nãpet tu!. Tik te hãmyümmüg xop te! pop 'üxexka xop yög pip'ax Yoneo xop yög Topa pet kopa ³⁹xix 'ãmuk xexka tu!, ⁴⁰tu hokmãm xop yög hãpxop pop, tu' xupxet, tu Topa pu hãm'ãktux, puyiy tikmũ'ün hãmp'e'paxex yã' max. Topa te yög hãpkummuk mĩy'ax yãnãn xexkap-tup! Kaxiy.

'Ūn hok yūm te tayūmak nīm

41'Ūxip Yeyox Yoneo yōg Topa pet kopa tayūmak tat'ax mīpkox yīkak, tu' pēnāhā tikmū'ūn nūn, nūy tayūmak nīm tayūmak tat'ax kopah. Tikmū'ūn punethok 'ūp-texop xexka te tayūmak xohix nīm, 42 ha ta' nūn 'ūhūn, yā hok yūm, yā hām hōgnāg. 'Ūnūn, tu nūktu tayūmak 'ānuk tix mō'tat mīpkox kopah, yā tayūmak kutōgnāg. 43 Ha Yeyox te yāy yōg tik xop xānāhā, tu:

—'Āte xa hāpxe'e 'āktux, nū 'ūn hok yūm, yā hām hōgnāg, pa yā hāpxop xohix mō'tat, pa nōm nōy xohix te hāpxop kutōgnāg mō'tat. 44 Yā 'ūp-texop xexka xop yōg hāpxop punethok, tu tayūmak yāgnāg xut, nūy mō'tat, ha yōg hāpxop punethok pip, pa 'ūn hok yūm te yāy yōg hāpxop xohix mō'tat, ha' nōg. Kaxīy.

Topa pet xexka kōyyōy putup**13**

¹Tu ta' mōg Yeyox xix yāy yōg tik xop, ha tik xop te:

—Yāyā, pēnā Topa pet xexka 'ūmax xe'ēgnāg, yā mīptut max!

²Ha Yeyox te:

—'Ok mīptut max xe'ēgnāg pēnāhā'? Hāpxip 'īhā yōg mīkaxxap te' nōy yīmū' mām putup'ah, yā' xohix xexka koxyōy putup! Kaxīy.

Tikmū'ūn te 'āxop xūygāp-tup

³Tu ta' mōg Yeyox xix yāy yōg tik xop, tu mōktu yīktix 'Onimet yīmū' mām, ha Pet te' yīkopit, xix Tiak te, xix Yoām te, xix 'Ānene te', hu:

4—Hām'ūmhā nōm hāpxopmāp-tup? Tikmū'ūn te hāpxopmā'ax 'ūm pēnāp-tup, 'īhā nōm hāpxopmāp-tup? Kaxīy.

⁵Ha Yeyox te hāmyūmmūgāhā kōnāmāhā', hu:

—Pa 'ātix, nūy hāmyūmmūg, nūy 'ākuxa mām hok koit'ax kopah. ⁶Yā' nūn putup 'ūxohix, tu hām'āktux putup, hu: “'Ūgmūn nō'om, Topa tek mūn yāy kutnāhā', yā Yeyox 'ūgmūn!” Kaxīy. Ha tikmū'ūn xohix kuxa mām putup koit'ax kopah. ⁷'Āxop te' xupak putup hāmnūhūn xexka hāmhūmnāg, yā tikmū'ūn te yāy kix kakīynāg. Ha tikmū'ūn nūn putup, tu: “Yā yāy kix kakīynāg tikmū'ūn hāptox tu!” Kaxīy. 'Āpu 'ākuxa nōg hok. Yā tikmū'ūn te yāy kix putup te kaxīy, pa hāpkux 'ohnāg. ⁸Hāpxexka yōg tikmū'ūn te hāpxexka nōy yōg tikmū'ūn mūtik yāykix putup, ha ta' hep xop te' hep xop nōy mūtik yāy kix putup, ha ta hām xexka yāy nuhuk nām panip putup, ha ta hāmhōgnāg, ha putup te tikmū'ūn kix putup. 'Ūn tek-tok put putup, tu' xūy xexka! Hā kaxīy tikmū'ūn xūy putup, ha mōktu hāpkux.

⁹Pa 'ātix, tikmū'ūn te 'āxop mōgāp-tup 'ūpa te hāmyūmmūg xop tu', puyīy 'āxop kopit, yā 'āxop kummugāp-tup. Ha tikmū'ūn nūn putup kamah, nūy 'āxop kix xikot hā Yoneo xop yōg Topa pet kopah. Yā 'ākuxa mām 'ūgkopah, yīy ta' nūn putup tikmū'ūn, nūy 'āxop mōgā gohenanok tu' xix gohet yōg xat'ax xexka tu', puyīy 'āxop kopit, ha 'āxop te nōm pu Topa yōg hām'āpak max'ax 'āktux, ¹⁰ha tikmū'ūn te' hep xop xohix xexka pu Topa yōg hām'āpak max'ax 'āktux putup hāmāxap, hak-nāy tu hāpkux. ¹¹Tikmū'ūn te 'āxop mūg, nūy 'āxop mōgā' gohet

yõg xexka xop tu'. 'Äpu 'äkuxa nõg hok. 'Äpu hãmpelãpaxe hok, hu: "Äte putep xuktux putup?" Kaxiy. Pa 'ãmhok, 'ãmõg putup gohet yõg xexka tu', ha Topa te xa hãm'ãktux'ax hõm putup, xayiy hãm'ãktux, yã 'õg hãm'ãktux 'ohnãg, pa yã Topa Koxuk mün yõg. ¹²Tikmũ'ün punethok te yã taknõy mõgãp-tup gohet yõg xexka xop tu', puyiy nõm kix, ha ta 'atak te yã kutok mõgãp-tup kamah xi' tut te', puyiy nõm kix. Ha tak-tok te 'atak mõgãp-tup kama xi' tut, puyiy nõm kix, ha' xakix putup 'ũxohix. ¹³'Äkuxa mãm 'ũgkopah, yiy tikmũ'ün te 'ãp-tup nõg putup, pa 'ãpu 'äkuxa mãm ka'ok mõkuma'ãmõg, ha Topa te 'ãhinnãp-tup. Kaxiy.

'Üxüy xexka'

¹⁴Yeyox te xe:

—'Äxop te' pãnãp-tup hãpxop yã 'igã xexka 'ünõy yõg xip'ax tu'—xate nũ mõkupix, 'ãpu hãmyümmüg—'ãxop pip hãpxexka Yonex tu', nüy ta mõg mõ'ka'ok yĩktix tu'. ¹⁵'Äxop mãm mĩptut yĩmũ, nüy ta mõg mõ'ka'ok. Mĩptut hã mõxa hok, nüy hãpxop pa'. ¹⁶'Äxop pip hãpxa tu', nüy ta mõg mõ'ka'ok, yã pet hã mõxa hok, nüy topixxax pa' ¹⁷Yã' kummuk xexkap-tup 'ün tek-tok xuk xop pu' xix 'ün tek-tok put xop pu'. ¹⁸'Äpu Topa pu hãm'ãktux, nüy ta tu' xak, puyiy tikmũ'ün 'ãxop kummugã mõ'ãgmüg pukpex 'ihã'. ¹⁹Yã nõm 'ãmnüy hã 'ãxop xüy xexkap-tup, pa hõmã Topa te' mĩy hãm xexka xix hõnhã' xüy kutõgnãg. ²⁰Topa te' xat, xayiy 'ãmnüy xohix'ah hã 'ãxop xüy putup. Topa te' xat hok, puxix xakix xohix xexka'. Pa' pip Topa kopa kuxa mãm ka'ok xop, yã Topa te nõm yĩmõgãtux, nüy nõm hĩnnã', hu' xat putup, puyiy 'ãmnüy xohix'ah hã' xüy.

²¹—Tikmũ'ün te hãm'ãktux putup, hu: "Mũ, nüy pãnã', Topa yõg yãykutnã'ax xip nũnteh." Kaxiy. Ha ta' nõy te hãm'ãktux putup, hu: "Mõg, nüy pãnã', Topa yõg yãykutnã'ax xip 'õnteh, yã' xip Yeyox." Kaxiy. 'Äpu 'ãyipkox pip hok. Yã' koit. ²²Yã nõm koit xop te Topa pupi hãm'ãktux xop putuk putup, tu Topa yõg yãykutnã'ax putuk putup, tu hãpxopmã ka'ok xe'ëgnãg, nüy Topa putuk, puyiy tikmũ'ün kuxa' yëy. Nõm tep-tup, nüy Topa yõg yĩmõgãtux xop kuxa mãm koit'ax kopah. ²³Pa 'ãtix. 'Äte 'ãxop pu hãmyümmügãhã' hõnhã'. Hãpxip 'ihã nõm hãpxopmã'ax pãnãp-tup, tu' yümmüg putup. Kaxiy.

Tikmũ'ün Kutok putpu' nũn

²⁴Yeyox te xe:

—Yã' xüy xexka nõg putup, ha ta mãyõn yãyhãp-tup hãpkoxtap, ha ta mãyõn hex yãnãm pip putup'ah, ²⁵ha ta mãyõnnãg pip pexkox yo'oma', pa xakux putup, ha ta hãpxop xohix ka'ok nuhuk putup pexkox yo'oma' xix pexkox kopah, ²⁶ha ta pexkox tuk yĩxop-tup, yã Tikmũ'ün Kutok, tu hãmgõy xexka kopak yĩxop-tup, yã' max xe'ëgnãg, ha tikmũ'ün xohix te' pãnãp-tup, ²⁷ha 'ãte yã yõg pexkox yõg nũ'pok xop mõ'pok putup hãpxexka xohix tu'. 'Ümõg putup, nüy Topa yõg yĩmõgãtux xop nũnnã', puyiy xohix yã tu nũ'nã'. Kaxiy.

Piget kup

²⁸Yeyox te xe:

—'Āpu hāmyūmmūg. 'Ūxip piget kup, tu yōg mīm̄māg tup, tu yōg mīxux xupep. 'Āxop te' pēnāhā' tu' yūmmūg mō'āgmūg pukpex, yā tex tihix. ²⁹Hā kaxīy xate nōm hāpxopmā'ax pēnāp-tup 'āte xa nōm 'āktux, tu' yūmmūg putup 'ūgnūn putup putpu'. ³⁰'Āpu hāmyūmmūg, hōnhā' pip tikmū'ūn, ha ta' yāg te nōm hāpxopmā'ax xohix pēnāp-tup, pa yā' yāg te' pēnāp-tup 'ohnāg, pa xakix putup hāmāxap. ³¹'ūnōg putup hām̄nōgnōy xix hām xexka', pa yōgnū hām'āktux pip mōkuma'mōg, tu' nōg putup 'ohnāg. Kaxīy.

Hām'ūmhā

³²Yeyox te xe:

—Hām'ūmhā tikmū'ūn te nōm hāpxopmā'ax pēnāp-tup? Hāptup 'ūm, pe 'ām̄nīy 'ūm? Māyōn yūm 'ūm? Yā pexkox nū'pok xop te' yūmmūg 'ohnāg, ha Topak-tok te' yūmmūg 'ohnāg, pa 'ātak Topa puxehnāg te' yūmmūg. ³³Pa 'ātix. 'Āpu 'ūkhip, nūy hāmpēnā'. Yā 'āxop te' yūmmūg 'ohnāg. Hām'ūmhā nōm hāpxopmā'ax pēnāp-tup? Yā 'āxop te' yūmmūg 'ohnāg. ³⁴Yā hā kaxīy putuk. Tik mōg putup hāptox tu', tu kāmānat xex, puyīy hām, tu hāmyīkox pēnā'ax xat, puyīy hāmpēnā', tu ta' mōg tihik. ³⁵Hām'ūmhā putpu' nūn putup tihik, 'ok pe 'āmāxak, 'ok pe 'ām̄nīy kote hā, 'ok pe xokakkak tak xata hā, 'ok pe hām yāy kuhmōy hā? Yā kāmānat te' yūmmūg 'ohnāg. Hā kaxīy tikmū'ūn te' yūmmūg 'ohnāg, hām'ūmhā 'ūgnūn putup putpu'. ³⁶'Ūgnūn putup, pa tikmū'ūn mō'yōn, yā' kummuk. ³⁷'Āte xa hām'āktux, xix tikmū'ūn xohix pu nōm 'āktux, hu: “Pa 'ātix!” Kaxīy.

'Ūp-tup, nūy Yeyox putex

14 ¹Hōnhā 'ām̄nīy tix 'īhā 'āmuk xexka xip'ax, yā 'āmuk xexka 'āxet'ax Nōa' Yēn xix Pām Tokatok Hok. Ha 'āmānex xexka xop tep-tup xix tik te hāmyūmmūg xop tep-tup, puyīy xonat xop Yeyox mūy, puyīy kīy, 'ūp-tex putup hah, ²tu yāy mūtik hām'āktux, hu:

—Pa 'ām̄hok hōnhā'ah. Yā 'āmuk xexka xip. Hōnhā yūmū'āte Yeyox putex, puxix tikmū'ūn gāy xexkah. Nāy, pu 'āmuk xexka mā kux. Kaxīy.

Yeyox xip xiptuxexka Metān tu'

³'Ūxip Yeyox xiptuxexka Metān tu' Xīmām pet kopah, yā Xīmām xax kunutnām. Ha ta' nūn 'ūhūn, tu mīkaxxap koxnāg max nūnnāhā', yā mīkaxxap 'anamax hā' mīy, ha' kopa' xip hep haxnāg max 'ūxuxet'ax nān, yā takat xexkah. 'Ūn nūn, tu nūktu mīkaxxap koxnāg koxyōy, tu Yeyox putox yīmū hep pux. ⁴Ha ta' pip tikmū'ūn, tu' gāy, tu yāy mūtik hām'āktux, hu:

—Yā' kummuk. Teptu hā kaxīy hep haxnāg max putyōn? ⁵Yā hep nōmenex, pu' max, nūy tayūmak pop, nūy 'ūhok xop pu nōm popmā'. Yā

yõg tayũmak xexkah, yã yõg tayũmak 'ãnuak, yã yãnãm ponnok hã mĩy, yã xohix te' 300 'ũyõg tayũmak 'ãnuak. Kaxĩy.

Yã tikmũ'ũn te 'ũn mãnõg, ⁶ pa Yeyox te:

—'Ũmãnõg hok' Teptu 'ãxop gãy xexkah? 'Ũn te hãpxopmã max. ⁷Yã' hok xop pip mõkuma'mõg 'ãxop kopah. 'Ãxop tep-tup, nũy ta nõm hã tehet, pak xip ka'ok 'ohnãg 'ãxop kopah. ⁸'Ũn te hãpxopmã max yũmmũg, hu' mĩy. 'Ũkxok putup, hak hãpkot putup, yĩy ta hõnhã 'ũn tek yĩn muk, nũy haxyã max, xokxax putuk. ⁹'Ãte xa' hãpxe'e 'ãktux tikmũ'ũn te hãpxexka xohix tu' Topa yõg hãm'ãpak max'ax 'ãktux putup, tu nũ 'ũn 'ãktux putup kamah.

Yot te gãy xop mõgãp-tup Yeyox ha

¹⁰Ha ta' mõg Yot 'I'xkanot, yã' xip Yeyox yõg tik te 12 xop kopah, tu' mõg, tu mõktu 'ãmãnex xexka xop mütik hãm'ãktux, nũy gãy xop mõgã Yeyox ha, puyĩy xũygã', ¹¹ ha 'ãmãnex xexka xop te' xupak, hu' kuxa hittup, tu:

—'Ũgmũ'ãte xa tayũmak popmãp-tup. Kaxĩy.

Hã kaxĩy Yot te gãy xop mõgãp-tup Yeyox ha, puyĩy xũygã'? Yã Yot te hãmpe'paxex.

'Ãmuk xexka 'ãxet'ax Nõa' Yën

¹²'Ãmuk xexka xip 'ãxet'ax Pãm Tokatok Hok, yã 'ãmniy mãxap, 'I'hã Yoneo xop te kahnën kutok kix 'ãmuk xexka 'ãxet'ax Nõa' Yën pu'. Ha ta' pip Yeyox yõg tik xop, tu Yeyox pu hãm'ãktux, hu:

—Pi'yã xatep-tup? Pi'yã 'ũgmũ'ãte 'ãmuk xexka Nõa' Yën mĩy putup? Kaxĩy.

¹³Ha Yeyox te yãy yõg tik mõ'pok, tu' xat, hu:

—Mõg kãmën tu'. 'Ãmõg putup, pa' mõg putup tihik, tu naxtox hã kõnãg tat putup. 'Ápu nõm pe mõg. ¹⁴Tik te mĩptut hã mõ'nãp-tup. 'Ápu nõm hã mõxã kamah, nũy xuxyã pu hãm'ãktux. 'Ápu hãm'ãktux, hu: "Yãyã te' yĩkopit. Pi'yã' yũm hãm'ãta kox? 'Ũgmũ'ãte 'ãmuk xexka Nõa' Yën mĩy putup 'õnteh, 'ũgmũn xix yãy yõg tik xop." Kaxĩy. ¹⁵Ha tik te xa' mũg hãm'ãta kox max, yã pepi' yũm, ha' pip mĩmpe max. 'Õnte 'ãxop te' mĩy putup 'ãmuk xexkah. Kaxĩy.

¹⁶Ha ta' mõg Yeyox yõg tik tix, tu mõktu hãpxop xohix pãnãhã Yeyox te nõm xuktux, tu 'ãmuk xexka 'ãxet'ax Nõa' Yën mĩy.

¹⁷'Ãmãxak ha ta' mõg Yeyox xix yãy yõg tik xop, tu mõktu hãm'ãta kox hã' mõxaha', ¹⁸ tu mĩmpe xit'ax tu' mãm, tu' xit, ha Yeyox te:

—Hamũn, 'ãte xa hãm'ãktux. 'Ũxip tihik 'ãxop kopah, tuk mütik xit. Tute' gãy xop nũnnãp-tup, puyĩy 'ũgxũygã'. Kaxĩy.

¹⁹Ha Yeyox yõg tik xop kuxa hittup 'ohnãg, ha yãp-xet te:

—Yãyã, 'ũ'ũm? 'Ok 'ũgmũn? Kaxĩy.

Ha ta' nõy te yĩkopit, ha' nõy te, tu mõktu xohix te' yĩkopit kamah.

²⁰Ha Yeyox te:

—Yã tik puxet 'ãxop kopah, yã nõm te pãm pix putup kãnëy pet xax kopah. ²¹Yã 'ũkxok putup, yã Tikmũ'ũn Kutok xok putup. Yã hã kaxĩy Topa yõg

tappet te nôm 'áktux. Tik te gāy xop mōgāp-tup Tikmũ'ün Kutok ha, puyĩy xũygā'. Yā' kummuk xexka nôm pu'. 'Ūtut te nôm put 'ohnāg, pu' max! Kaxĩy.

Pām mähā', tu xupyāg xo'op, nũy Yeyox pe'paxeh

²² Ūxit Yeyox xix yāy yōg tik xop, ha Yeyox te pām paha', tu Topa pu hām'áktux, hu:

—Xatek mũ'ā pām popmähā'. 'Ámax. Yā' max. Kaxĩy.

Yeyox te pām koxip, tu yāy yōg tik xop pu nôm popmähā', tu:

—'Ápu 'ūpop. Nũhũ yā 'ūgyĩn. Kaxĩy.

²³ Tu kănēy xo'op'ax paha', tu Topa pu hām'áktux, hu:

—Topa, yā' max, 'āmax. Kaxĩy.

Tu ta yāy yōg tik xop pu' hōm, ha' xo'op. ²⁴ Ha Yeyox te:

—Nũhũ yā 'ūkhep 'āta. 'Áte yāy hep 'āta tikmũ'ün xohix pupi nũ'nāp-tup.

'Ūkhep 'āta yā pa'ax tup Topa yōg xix tikmũ'ün yōg. ²⁵ 'Áte xa hām'áktux xe'e', 'āte xe xupyāg xo'op putup'ah. Nāy, pu Topa yāy yōg tikmũ'ün xat putup, ha' yĩpkox pĩp, 'ĩhā xe' xo'op. ²⁶ Ha' xohix te Topa puk-tex, tu ta' mōg yĩktix 'Onimet tu'.

Yeyox te Pet pu hām'áktux

²⁷ Ha Yeyox te yāy yōg tik xop pu hām'áktux, hu:

—'Áxop xohix tek nĩm putup. Yā Topa yōg tappet te: “Tikmũ'ün te kahnēn pēnā'ax putex putup, ha ta kahnēn xumāp-tup.” Kaxĩy. ²⁸ Pa putpuk hip-tup 'ūgmũn, tu tak mōg putup 'áxop keppa hāpxexka Ganinet tu'. Kaxĩy.

²⁹ Ha Pet te:

—'Ámhok! 'Áte 'ānĩm putup'ah. Nōm xohix te 'ānĩm putup, koxix 'ānĩm putup'ah. Kaxĩy.

³⁰ Ha Yeyox te:

—'Áte xa hām'áktux xe'e: 'āmnĩy ha ta hām'áktux tikoyuk xate, hu: “'Áte Yeyox yũmmũg 'ohnāg!” Kaxĩy. Hāpxip 'ĩhā xokakkak tak xatap-tup tix. Kaxĩy.

³¹ Pa Pet te xe hām'áktux ka'ok, hu:

—'Ámhok! 'Áte nōm 'áktux putup'ah, 'āyũmmũg 'ohnāg. 'Ūkxok 'āmũtik, koxix nōm 'áktux putup'ah. Kaxĩy.

Ha ta nōm 'áktux kamah Yeyox yōg tik xohix xop.

Yeyox xip mĩm mātiknāg Yetxēm tu'

³² Tu ta' mōg Yeyox xix yāy yōg tik xop mũtik mĩm mātiknāg tu' 'ũxuxet'ax Yetxēm, tu' mōg, tu mōktu' mōxaha', ha Yeyox te:

—Māhām nũnteh, 'ĩhāg mōg, nũy Topa pu hām'áktux. Kaxĩy.

³³ Tu ta' mōg Yeyox, tu' mōgāhā Pet, xix Tiak xix Yoām, tu hāpxip 'ĩhā Yeyox kuxa hittup 'ohnāg kōnāmāhā', tu' kuxanōg xexkah, ³⁴ tu:

—'Ūgkuxa hittup 'ohnāg, yāg xok putup putuk. 'Ápu nox 'āti nũnteh, nũy 'ũkhip. Pa 'ātx. Kaxĩy.

³⁵ Tu ta' mōg kutōgnāg, tu mō hām nĩy, tu Topa pu hām'áktux, hu:

—Topa, xate! xat, kopxik xūy putup!ah. ³⁶Tak yōgnū 'ātak, xate hāpxopmā xohix yūmmūg. 'Āpu xat, 'ūyīy xūy hok. Pa 'ātep-tup!ah 'āte nōm putup, pa 'ātep-tup xate nōm putup. Kaxīy.

³⁷Tu ta' nūn putpu!, tu nūktu yāy yōg tik tikoyuk pēnāhā!, ha mō'yōn, ha Yeyox te Pet pu:

—Xīmām, 'ok mō'ōn? 'Ok māyōn mōg kutōgnāg hāg hip 'ohnāg?
³⁸'Āpu 'āpa ka'ok, nūy Topa pu hām'āktux, puyīy nōy 'āxapit hok, xayīy hāpkummuk mīy. 'Ākoxuk tep-tup, nūy mō'yōn hok, pa 'āyīn tep-tup, nūy mō'yōn, yā 'ākoxuk ka'ok, pa 'āyīn pu'uk. Kaxīy.

³⁹Tu ta xe' mōg Yeyox, nūy Topa pu hām'āktux, tu yōg hām'āktux 'āktux 'ūxehet, yā' yāy putuk, ⁴⁰tu ta xe' nūn putpu!, pa' pip yāy yōg tik xop, tu mō'yōn. Yā kūmīm tep-tex xexkah, tu' pa ka'ok yūmmūg 'ohnāg, tu yānān hām'āktux yūmmūg 'ohnāg.

⁴¹Ha ta' xe' mōg Yeyox, tu xe' nūn putpu!, yā' nūn tikoyuk, tu:
—'Ok mō'ōn kux!ah, 'ok kūmīm te 'āp-tex? Puxix! Yā nōmhā! Yā nōmhā tik nūn, nūy hāpkummuk mīy xop nūnnā!, puyīy 'ūgmūn Tikmū'ūn Kutok xūyḡā!. ⁴²Pepix 'āpip. 'Āpu yūmū mōg. Pēnā!, 'ūnūn tihik, tu' ḡāy xop nūnnāhā, puyīy 'ūkxūyḡā! Kaxīy.

Tikmū'ūn te Yeyox mūg

⁴³Yeyox te hām'āktux, 'īhā! xupep Yot, yā nōm te Yeyox yōg tik te 12 xop kopa' xip, ha nūmūti' mōxaha tikmū'ūn, ha' taha mīkaxxexka xix mīptopnāg. Yā 'āmānex xexka xop te nū'pok, xix tik te hām yūmmūg xop te!, xix Yoneo xop yōg xexka xop te!. ⁴⁴Yā Yot tep-tup, nūy ḡāy xop mōḡā!, puyīy Yeyox xūyḡā!, hu nūmūtik hām'āktux, “'Āte tik kep hā' mūg putup. 'Āpu nōm mūy, nūy mōḡā!. Yā nō'ōm.” Kaxīy.

⁴⁵Hāpxip 'īhā' nūn Yot, tu nūktu Yeyox yīkāgnāg xip, tu:
—Yāyā! Kaxīy.

Tu' nōy kep hā' mūg, yā xape xop putuk. ⁴⁶Ha tikmū'ūn te Yeyox mūg, tu' hīy. ⁴⁷Ha ta' xip tihik, tu mīkaxxexka xut, tu tik te 'āmānex xop xat yōg kāmānat yīpkox xak, ⁴⁸ha Yeyox te tikmū'ūn pu hām'āktux, hu:

—'Ok 'āxop nūn, tu' taha mīkaxxexka xix mīptopnāg, nūy xupxet hīy? Yā' putuk. ⁴⁹Hōmāg xip ka'ok 'āxop kopah, nūy 'āxop pu hāmyūmmūḡā! Topa pet xexka tu', pa 'āxop tek hīy 'ohnāg. Pa hōmā 'ūhittap nōm te kax'āmi Topa yōg tappet tu', ha ta hōnhā nōm putuk. Kaxīy.

⁵⁰Ha Yeyox yōg tik xop te Yeyox nīm, tu hāpxūmānām.

⁵¹Yā' xip tik tuktop, tu komenok ponnok hā' taha!, ha tikmū'ūn te' hīy putup, ⁵²pa tik te' nīm komenok, tu' xaxtop, tu ta' mōxupaha!

Yoneo xop yōg xexka xop te Yeyox kopit

⁵³Hāpxip 'Ihā tikmū'ūn te Yeyox mōgāhā tik te 'āmānex xop xat pet tu', tu mōktu' mōxaha', ha' pip 'āmānex xexka xop, xix Yoneo xop yōg xexka xop, xix tik te hāmyūmmūg xop.

⁵⁴Ha ta' xip Pet, tu hāptox tu Yeyox pe' mōg, tu mōktu' xupep tik te 'āmānex xop xat pet yōg hāmnuhnōg tu', tu' yūm kuxap yīkak xonat xop mūtik, nūy xapuk. ⁵⁵Ha ta' pip 'āmānex xexka xop, xix tik pa te hāmyūmmūg xop te hāmp'e'paxex, texīy Yeyox 'āktux kummuk putup, puyīy putex. Pa 'āmhok, 'ap yūmmūg'ah. ⁵⁶Tikmū'ūn xohix te' kupex, tu' koit, pa' yāy yōg hām'āktux te' nōy yōg putuk 'ohnāg.

⁵⁷Yā tikmū'ūn tek-nīhā' pip, tu' koit, hu:

⁵⁸—'Ūgmū'āte Yeyox yōg hām'āktux 'āpak, yā tute: “Tikmū'ūn te Topa pet xexka mīy, ha ta 'āte' koxyōy putup, pa 'āte xe' mīy putup 'āmnīy tikoyuk hā. Yā tikmū'ūn te nōm mīy putup 'ohnāg.” Kaxīy.

⁵⁹Tikmū'ūn te hām'āktux, pa' yōg kupex'ax te yāy putuk 'ohnāg.

⁶⁰Ha tak-nīhā' xip tik te 'āmānex xop xat tikmū'ūn kopah, tu Yeyox pu hām'āktux, hu:

—'Ok xate hām'āktux yānān 'ohnāg? Kaxīy.

⁶¹Pa' yēy. Yā hām'āktux yānān 'ohnāg, ha tik te 'āmānex xop xat te xe:

—'Ok Topa te 'āyāyikutnāhā'? 'Ok Topa xe'ēgnāg kutok? Kaxīy.

⁶²Ha Yeyox te:

—Yā hamūn. 'Āxop xohix tek pēnāp-tup, yā Tikmū'ūn Kutok pēnāp-tup. 'Ūgyūm putup Topa ka'ok yīm xe'e tu'. 'Āxop te kamak pēnāp-tup, 'ūkxip putup pexkox kopah, tu ta yīxop-tup hāmgōy xexka kopah! Kaxīy.

⁶³Ha tik te 'āmānex xop xat te yāy topixxax pot, yā' gāy, tu:

—Puxix. Yā hām'āktux kummuk! ⁶⁴Tute Topa 'āktux kummuk. 'Āxop te' xupak. Putep hāmp'e'āpaxex nōmhā'? Kaxīy.

Ha tikmū'ūn xohix te Yeyox putup nōg, tu hām'āktux, hu:

—'Āpu 'ūp-tex! Kaxīy.

⁶⁵Ha tikmū'ūn te yīynīn xōn kōnāmāhā Yeyox tu', tu' nōy putox mō'nīy, tu' kix, tu:

—'Āpu hām'āktux. Tep-te 'ākix? Kaxīy.

Ha ta' pip xonat, tu Yeyox kix yāy yīm hā.

Pet te hām'āktux Yeyox yūmmūg 'ohnāg

⁶⁶Ha ta' xip Pet kukpa hāmnuhnōg tu', ha' nūn tik te 'āmānex xop xat yōg kāmānat hex, ⁶⁷tu nūktu Pet pēnāhā', tu:

—Hōmā 'āxip kōmēn Nāyane yōg Yeyox mūtik, yā yōg xop kopa 'āxip. Kaxīy.

⁶⁸Pa Pet te:

—'Ap 'áte nôm yümmüg'ah. Putep 'äktux? Kaxiy. Tu ta' mög Pet hãmpak'ax mō'ninyin'ax tu', 'ihã xokakkak tak xataha'. ⁶⁹Ha kãmānat hex te Pet pēnāhā', ha yīka' nōy pip, ha kãmānat hex te:

—Hamūn, tihik 'ohōm yā Yeyox yōg xop kopa' xip. Kaxiy.

⁷⁰Pa Pet te:

—'Āk mūn'ah. Kaxiy.

Hãpxip 'ihã tikmū'ūn te:

—Hamūn. 'Ūgmū'āte' yümmüg xe'e. 'Āxip Yeyox yōg tik xop kopah. Hamūn, 'āmūn yā hãpxexka Ganinet yōg tihik kamah. Kaxiy.

⁷¹Ha Pet te:

—'Āte xa hãm'äktux, ha Topa te' xupak, tu' yümmüg. 'Āxop te tik 'äktux, pa 'äte nôm yümmüg 'ohnäg! 'Āte' koit, puxix Topa 'ügkix! Kaxiy.

⁷²Hãpxip 'ohnäg 'ihã xe' xataha xokakkak tak, ha Pet te' xutigāhā', yā hōmā Yeyox te: “Xate hãm'äktux tikoyuk, hu: 'Āte Yeyox yümmüg 'ohnäg! Kaxiy. 'Ihã xokakkak tak xatap-tup tix.” Kaxiy.

Ha Pet kuxa hittup 'ohnäg, hu' potaha'.

Yeyox xip Pinat keppah

15 ¹Māyōn xupep 'Ihã yāytunū'nāhā 'āmānex xexka xop, xix Yoneo xop yōg xexka xop, xix tik te hāmyümmüg xop, tu hãm'äktux tik pa te hāmyümmüg xop mütik.

Ha ta xonat xop te Yeyox hīy, tu ta' mōgāhā Pinat hah, tu mōktu Pinat pu Yeyox hōm. ²Ha Pinat te Yeyox pu hãm'äktux, hu:

—'Ok xate Yoneo xop xat? Kaxiy.

Ha Yeyox te:

—Hamūn. Xate hãm'äktux. Kaxiy.

³Ha 'āmānex xexka xop te Yeyox 'äktux kummuk punethok. ⁴Ha Pinat te xe yīykopit, hu:

—'Ok xate hãm'äktux hã yānān 'ohnäg? 'Āpu 'ūxupax, nōm xop te hãm'äktux 'ākummuk! Kaxiy.

⁵Pa Yeyox te xe hãm'äktux yānān 'ohnäg, yīy Pinat kuxa kopa' yēy.

Tikmū'ūn te hãm'äktux Yeyox 'ükummuk

⁶'Āmuk xexka 'āxet'ax Nōa' Yēn xip, ha tikmū'ūn te ta tu' xak, yīy ta Pinat te tik xut kanet ka'ok kopah, pu mög. Yā hāmyāxatamuk xohix hã kaxiy. ⁷Ha ta' xip tihik 'āxet'ax Mahamax kanet ka'ok kopa yāy xape xop mütik. Yā hōmā tikmū'ūn te gohet yōg xop mütik yāy kix, ha Mahamax te tikmū'ūn kix, ha' xakix.

⁸Ha ta' nūn nōmhā tikmū'ūn, nūy ta tu' xak, puyīy tik xut kanet ka'ok kopah, pu mög, Yā hāmyāxatamuk nōy xohix putuk. ⁹Ha Pinat te:

—'Ok 'āxop tep-tup, 'ūyīy xut, pu mög Yoneo xop yōg xat'ax Yeyox? Kaxiy.

¹⁰Yã Pinat te' yūmmūg 'āmānex xexka xop Yeyox hã yīpkumīy, hu Yeyox nūnnāhã Pinat hah, ¹¹tu hām'āktux hã tikmū'ūn gāyāhã', puyīy ta tu' xak, puyīy Pinat Mahamax xut pu mōg, 'ap Yeyox'ah, ¹²ha Pinat te: —'Āxop te putep-tup, 'ū mīy tik mūtik? Yã 'āxop te nōm xānāhã nōm te Yoneo xop xat. Kaxīy.

¹³Ha tikmū'ūn te:

—'Āpu mīpkup nix yīmūp-tex pipkup hã. Kaxīy.

¹⁴Ha Pinat te:

—Teptu, putep kummuk mīy? Kaxīy.

Ha tikmū'ūn te hām'āktux ka'ok nōy nã' mōg, hu:

—'Āpu mīpkupnix yīmūp-tex! 'Āpu mīpkupnix yīmūp-tex! Kaxīy.

¹⁵Ha Pinat tep-tup, nūy tikmū'ūn kuxa hittupmã', hu Mahamax xut, pu mōg, tu hāpxip 'ihã xat, puyīy xonat Yeyox kix xikot hã, tu xonat xop pu Yeyox hōm, pup-tex.

Xonat te Yeyox kute'ex kummuk

¹⁶Ha ta' mōg xonat xop, tu Yeyox mōgāhã gohenanok pet tu', tu mōktu' mōxaha', ha xonat xohix te yāy tu nū'nāhã'. ¹⁷Hāpxip 'ihã xonat te Yeyox pu mō xax tat, yã topixxax tox 'āta', puyīy xexka xop putuk, tu Yeyox putox yīmū' xix kuxxax, puyīy xexka xop putuk, yã mīmyāmtoxmāg hã' mīy. ¹⁸Xonat te: —'Āmax xe'ēgnāg! Xate Yoneo xop xat! Kaxīy.

¹⁹Xonat te Yeyox putox kix mīm xahix hã, tu mōg yīyhep yōn, tu kopaxux tu' pip Yeyox keppah, yã' xexka xop keppa putuk, yã' xexka xop 'āpak putuk, ²⁰tu Yeyox kute'ex kummuk kux, tu topixxax tox 'āta xut, tu mō xax tat, yã Yeyox yōg, tu Yeyox mōgāhã hāptopah, nūy mīpkupnix yīmūp-tex.

Yeyox putex mīpkupnix yīmū'

²¹Tu ta' mōg, tu putat hã' mōg, pa' xip tihik 'āxet'ax Xīmām, yã hām panip tu' nūn, tu kōmēn tu' mōg, yã kōmēn Xinēn yōg tihik, yã 'Anexān mūktak xix Hop mūktak. Ha ta' xat xonat te, pu Xīmām mīpkupnix tat, ha' taha', ²²ha xonat xop te Yeyox mōgāhã hām tu 'āxet'ax Gok, yã tikmū'ūn yīy'ax hã: “Hām tu' xip putox kup.” Kaxīy. Tu' mōg tu mōktu' mōxaha', ²³ha xonat te Yeyox pu' hōm xupyāg xix hehmēn, yã xupyāg hã' kanop hehmēn, pa yã' xo'op'ah, ²⁴ha xonat te Yeyox xix mīpkupnix yīmū' pipkup hã, tu mō' xap yōn, nūy xonat puxet pu Yeyox xax hōm, ha ta' nōy pu' nōy hōm hã kaxīy. ²⁵Yã māyōn te pexkox puka' yūm 'ihã mīpkupnix yīmū' xup Yeyox pipkup hã.

²⁶Ha ta 'ōm xip, tu' kax'āmi, hu: “Tik te Yoneo xop xat”. Kaxīy. Tu nōm xix mīpkupnix yīmū'.

²⁷Ha xonat xop te mīpkupnix yīmū xupxet tix kix pipkup hã, yāp-xet xup Yeyox yīm xe'e tu', ha ta' nōy xup 'ūyīm xax tu'. ²⁸Hã kaxīy Topa yōg tappetxax te hām 'āktux xe'e! Yã Topa yōg tappetxax te, “Yã' xip 'ūkummuk xop mūtik.”

²⁹Ha ta' nūn tikmū'ūn, tu nūktu Yeyox mānōg, tup-tox mahap, tu:

—'Ûgãynãm! Tute hãm'ãktux Topa pet xexka koxyõy yũmmũg, tu xe' mĩy yũmmũg 'ãmniy tikoyuk hã' ³⁰Pu yã yĩyxoX mĩpkupnix tu', nũy xok hok. Kaxĩy.

³¹Ha ta Yeyox mãnõg kama 'ãmãnex xexka xop te' xix tik te hãmyũmmũg xop te', tu:

—Tute tikmũ'ũn hĩnnã yũmmũg, pa yãy hĩnnã yũmmũg 'ohnãg! ³²Topa te 'ãayãkutnãhã, ha xate Yoneo xop xat. 'Ãpu mĩpkupnix tu yĩyxoX. 'Ûgmũ'ãte' pãnãp-tup, huk mũg kuxa mãm putup 'ãkopah! Kaxĩy.

Ha ta xupxet te Yeyox kute'ex kummuk kamah.

Yeyox xok

³³Mãyõn te yãykote' yũm, pa hãm xohix tu hãpkoxtap, tu mõktu mãyõn he'.

³⁴Ha mãyõn he 'ihã Yeyox te hãm'ãktux ka'ok, hu:

—“'Enix, 'Enix, nãmã xamatãn?” Kaxĩy. Yã tikmũ'ũn yĩy'ax hã: “Yõgnũ Topa, yõgnũ Topa, teptuk nĩm?” Kaxĩy.

³⁵Ha tikmũ'ũn te' xupak, tu:

—'Ûxupax! Tute 'Enit xãnãhã! Kaxĩy.

³⁶Ha 'õm xip, tu ta' mõg, tu tohok hã xupyãg kummuk xup, tu mĩm hã' xuhmĩy, tu' nũnnãhã', tu Yeyox pu' hõm, pu xo'op. Tute:

—'Ãpu yũmũ'ãte pãnã'. 'Ok 'Enit nũn, nũy mĩpkupnix tu' xut? Kaxĩy.

³⁷Ha Yeyox te hãm'ãktux ka'ok, tu' xok xe'e'.

³⁸Ha ta Topa pet xexka yõg topixxax mõhãmniyĩn'ax pot 'ũpepix mõktu' kakak. ³⁹Ha ta' xip xonat yõg kapitãm Yeyox keppah, tu Yeyox te hãm'ãktux ka'ok 'ãpak, tu Yeyox xok pãnãhã', tu:

—Hamũn, tihik nũhũ' yã Topak-tok! Kaxĩy.

⁴⁰Ha ta' pip 'ũhũn hãptox miãx tu', tu' pãnãhã', yã 'ũn xop kopa' pip Mãnix Mãnãnãn, xix Xanomẽ', xix Manix, yã Yoye mũktut xix Tiak mũktut, yã Tiak yã tuktup. ⁴¹Yã hõmã 'ũn te Yeyox mũtik mõg pax tu hãpxexka Ganinet tu', tu Yeyox pu hãpxop max mĩy. Ha ta' pip kama 'ũn nõy xohix. Yã' nũn Yeyox mũtik kãmãn Yenoyanãn tu'.

Yeyox yĩn xix mĩkaxxap kox kopah

⁴²⁻⁴³'Ãmãxak 'ihã' nũn Yoye', yã kãmãn 'Animãtex yõg tihik, yã' xexkah, tu tik pa te hãmyũmmũg xop kopa' xip. Yã tute' hip Topa te yãy yõg tikmũ'ũn xat, ha' yĩpkox pip. Yã xexta pet 'ãmãxak 'ihã Yoneo xop te hãmmaxnãhã nit xap pu', yĩy ta Yoye kuxanõg 'ohnãg, hu ta' mõg Pinat hah, nũy ta tu Yeyox xokxax xax. ⁴⁴Pinat te' xupak Yeyox xok xe'e nõmhã, tu' yẽy, yã' xok mõ'ka'ok. Pinat te' xãnãhã Hõm yõg xonat xop yõg xat'ax, yĩy ta' nũn, tu nũktu' xupep. Ha Pinat te:

—'Ok xok tãmniãg Yeyox? Kaxĩy.

⁴⁵Ha:

—Hamũn. Kaxĩy.

Ha Pinat te Yoye pu xokxax hõm.

⁴⁶Ha ta' mōg Yoye, tu topixxax paha!, tu ta' mōg, tu mĩpkupnix tu Yeyox yĩn putxok, tu topixxax hã' kiy, tu' nũn, tu nũktu mĩkaxxap kox kopa' xix, tu mĩkaxxap xexka yōkãnãmãhã hãmyĩkox kopah, ⁴⁷ha Mãnix Mãnãnẽn te' pẽnãhã xix Mãnix te', yã Yoye mũktut. Yã Yeyox yĩn pẽnãhã' xix mĩkaxxap kox.

Yeyox te putpu' hix

16 ¹Nit xap 'ãmnĩy tuknōg nōg 'ihã' mōg Mãnix Mãnãnẽn, xix Xanomẽ', xix Mãnix, yã Tiak mũktut, tu hep hãynãg max paha!, nũy Yeyox yĩn muk. ²Yenomĩy mãyõn xupep 'ihã' mōg mĩkaxxap kox tu', ³tu putat kopa yãy mũtik hãm'ãktux, hu:
—'Ū'ũm tek mũ'ã mĩkaxxap xexka yōkãnãmãp-tup, nũy xut hãmyĩkox tu'? Kaxiy.

⁴Yã' xexkanãm mĩkaxxap, yiy nōm 'ãktux. Pa' pẽnãhã', pa' xip'ah hãmyĩkox tu'. Tep-te' yōkãnãmãhã'? ⁵Ūn te mĩkaxxap kox hã' mōxaha!, pa' yũm tihik, tu yōg topixxax tox ponnok, yã' yũm 'ũn yĩm xe'e tu', yiy 'ũn te' yĩpkutuk xexkah. ⁶Pa tik te:

—'Ãkuxanōg hok! 'Ãte' yũmmũg, 'ãxop te' xak kōmẽn Nãyane yōg Yeyox. 'Ap xip'ah nũnteh. Yã putpu' hi'. Pẽnã 'ũyōg xip'ax nũnteh. ⁷Mōg, nũy Pet pu hãm'ãktux xix Yeyox yōg tik nōy pu'. 'Ápu hãm'ãktux, hu: "Yeyox te 'ãkeppa mōg hãpxexka Ganinet tu'. 'Áxop te' pẽnãp-tup 'õnteh. Yã Yeyox te xa nōm 'ãktux hōmã." Kaxiy.

⁸Ha ta' mōg 'ũhũn, tu' mōg mō'ka'ok, yã' yĩpkutuk, yã' kuxanōg, hu' yey, yã hãm'ãktux 'ohnãg.

Yeyox te Mãnix Mãnãnẽn pu yãy mũg

⁹Hãptup yenomĩy 'ihã putpu' hix Yeyox, tu Mãnix Mãnãnẽn pu yãy mũg hãmãxap. Yã hōmã Yeyox te' mōy yãmĩy kummuk te' ⁷Mãnix Mãnãnẽn kopah, ¹⁰ha ta' mōg, pa' pip Yeyox mũtik mōg xop, tu' kuxa hittup 'ohnãg, tu' potaha!, ha Mãnix Mãnãnẽn te:

—'Ūputpu' hix Yeyox. Kaxiy.

¹¹Ha' xupak, yã putpu' hi', tu tikmũ'ũn pu yãy mũg, pa' kuxa mãm 'ohnãg hãm'ãktux kopah.

Yeyox te yãy yōg tik tix pu yãy mũg

¹²Hãpxip 'ihã Yeyox te yãy yōg tik tix pu yãy mũg. Yã tik mōg hãm panip tu', tu Yeyox pẽnãhã', ¹³tu putpu' nũn, tu nũktu Yeyox yōg tik nōy pu nōm 'ãktux, pa' kuxa mãm 'ohnãg hãm'ãktux kopah.

Yeyox te yãy yōg tik te 11 xop pu yãy mũg

¹⁴Ha ta' mōg Yeyox, tu yãy yōg tik te 11 xop pu yãy mũg. Yã' xit tihik, ha' nũn Yeyox, tu tik pu yãy mũg, tu:

—Teptu 'ākuxa mām 'ohnāg. Tikmũ'ün te: “'Ūgmũ'äte' pēnāhā Yeyox. Yā putpu' hi'”. Kaxīy. Pa 'ākuxa mām 'ohnāg hām'āktux kopah. Yā' kummuk. Kaxīy.

¹⁵Tu xe:

—'Āpu mōg hāpxexka xohix xexka tu', nūy Topa yōg hām'āpak max'ax 'āktux tikmũ'ün xohix xexka pu'. ¹⁶Tikmũ'ün 'üm kuxa yūm ka'ok 'ūgkopah, hap-tox pix, puxix Topa kuxa kummuk xit, nūy kuxa max mō'tat, 'ūyānān tu'. ¹⁷Topa te' kuxa mām ka'ok xop ka'ogāp-tup, puyīy hāpxopmā ka'ok xe'ēgnāg. Yā yāmīy kummuk mōy putup, tu' yīy'ax tup punethok hā' xuktux putup. ¹⁸Kāyā gāy tep-top, puxix xūy 'ohnāg. Hep kummuk xo'op nōm te tikmũ'ün kix, puxix xūy 'ohnāg, tu pakut xop yīmū yāy yīm xex, puxix hittup.

Yeyox mōg pexkox tu'

¹⁹Yūmūg xuxyā Yeyox te hām'āktux kux, ha' nōy te' mōgāhā pepix pexkox tu', ha' yūm Topa yīm xe'e tu'. ²⁰Ha ta' mōg Yeyox yōg tik xop, tu tikmũ'ün pu Topa yōg hām'āpak max'ax 'āktux hāpxexka xohix tu'. Ha yūmamūg xuxyā te yōg hām'āktux ka'ogāhā', yā nōm mō'nīgnām, puyīy hāpxopmā ka'ok xe'ēgnāg. Hā kaxīy tikmũ'ün te' yūmmūg 'ūxe'e yōg hām'āpak max'ax.

Tu ta tu' kux.